

PROJEKTLIGJ

“PËR KONCESIONET DHE PARTNERITETIN PUBLIK PRIVAT¹”

Në mbështetje të neneve 78 e 83 pika 1 të Kushtetutës, me propozimin e Këshillit të Ministrave,

KUVENDI I REPUBLIKËS SË SHQIPËRISË VENDOSI:

KREU I DISPOZITA TË PËRGJITHSHME

Neni 1 Qëllimi i ligjit

Qëllimi i këtij ligji është të krijojë një kuadër të favorshëm dhe të qëndrueshëm për nxitjen, thithjen dhe krijimin e lehtësive për investimet që realizohen si koncesione/partneritete publike private.

Neni 2 Objekti i ligjit

Ky ligj rregullon kompetencat e autoriteteve dhe enteve kontraktuese për të hyrë në marrëveshje për investime të bazuara në koncesione/partneritete publike private, procedurat për dhënien e marrëveshjeve të tilla, si nënshkrimi, ndërprerja dhe ndryshimet e marrëveshjeve të koncesionit/partneritetit publik privat, ndarja e risqeve fiskale, çështjet që kanë të bëjnë me rregullimet financiare dhe mbështetjen, në lidhje me koncesionet/partneritetet publike private, politikën e këtyre koncesioneve e autoritetin për zbatimin e tyre, si dhe çështje të tjera që lidhen me koncesionet/partneritetet publike private.

Neni 3 Përkufizime

Në këtë ligj termat e mëposhtëm kanë këto kuptime:

1. “Koncesion” është koncesioni i punëve publike ose koncesioni i shërbimeve publike.
2. “Koncesioni i punëve publike” është një marrëveshje me interes financiar, e lidhur me shkrim ndërmjet autoritetit ose entit kontraktues dhe një ose më shumë operatorëve ekonomikë, objekti i së cilës është kryerja e punimeve, ku shpërblimi për punimet që duhet të kryhen përbëhet nga e drejta për të shfrytëzuar veprat që janë objekt i kontratës ose nga kjo e drejtë së bashku me pagesën.
3. “Koncesioni i shërbimeve publike” është një marrëveshje me interes financiar, e lidhur me shkrim ndërmjet autoritetit ose entit kontraktues dhe një ose më shumë operatorëve ekonomikë, objekti i së cilës është sigurimi i shërbimeve, ku shpërblimi për shërbimet që do të sigurohen përbëhet nga e

¹ Ky ligj është përafruar pjesërisht me direktivën 2014/23/EU të Parlamentit Evropian dhe të Këshillit të 26 Shkurt 2014 “Për dhënien e kontratave koncesionare”, numri CELEX: _____, Fletorja Zyrtare e Bashkimit Evropian, Seria L, nr. _____, datë _____, faqe 114-240.

drejta për të shfrytëzuar shërbimet që janë objekt i kontratës ose nga kjo e drejtë së bashku me pagesën.

4. “Kontratë e përzier” është një koncesion, objekti i të cilit është kryerja e punimeve dhe sigurimi i shërbimeve, që identifikohet si koncesion i punëve publike ose koncesion i shërbimit publik dhe ku vendimtar për të përcaktuar nëse një kontratë e tillë është koncesion i punëve publike apo një koncesion i shërbimeve publike është elementi nëse puna që do të kryhet është objekti kryesor i kontratës apo nëse puna është thjesht karakteristike për shërbimin publik që është objekt i kontratës.

5. “E drejta për të shfrytëzuar veprat dhe/ose shërbimet” ka kuptimin e mëposhtëm:

a) e drejta për të nxjerrë të ardhura, në përputhje me kontratën e koncesionit/partneritetit publik privat; si dhe

b) transferimi të koncesionari/partneri privat i një risku operacional në shfrytëzimin e atyre punëve ose shërbimeve që përfshijnë riskun e kërkesës ose të ofertës ose të dyja. Koncesionari/partneri privat konsiderohet se merr përsipër riskun operacional kur, në kushte normale operimi, nuk garantohej rikuperimi i investimeve të kryera ose i kostove të krijuara gjatë operimit të punimeve ose shërbimeve që janë objekt i koncesionit/partneritetit publik privat. Pjesa e riskut që i transferohet koncesionarit/partnerit privat përfshin ekspozimin real ndaj ndryshimeve të papritura të tregut, në mënyrë që çdo humbje e mundshme e vlerësuar e shkaktuar nga koncesionari/partneri privat nuk është thjesht nominale ose e papërfillshme.

c) Risku operacional ka kuptimin e riskut, që lidhet me përdorimin e veprave ose ofrimit të shërbimeve ose riskun që lidhet me disponueshmërinë e objektit të infrastrukturës që ndërtohet ose përdoret për të siguruar shërbime për përfituesit fundorë, në përputhje me kontratën e koncesionit/partneritetit publik privat.

6. “Komunikimi me shkrim” është çdo shprehje që përbëhet nga fjalë ose shifra, të cilat mund të lexohen, të kopjohen dhe të komunikohen, përfshirë dhe informacionin që transmetohet dhe ruhet me mjete elektronike.

7. “Realizimi i punëve” është realizimi, ose të dyja, projektimi dhe realizimi i punëve që lidhen me objektin e koncesionit/partneritetit publik privat, ose me se realizimin, me çfarëdo mjeti, të një pune që përputhet me kërkesat e përcaktuara nga autoriteti ose enti kontraktues që ushtron një ndikim vendimtar në llojin ose projektimin e punës.

8. “Punë” është objekti, i cili është rezultati i ndërtimit ose i veprave civile inxhinierike, të marra si një tërësi, e cila është e mjaftueshme në vetvete për të përmbushur një funksion ekonomik ose teknik.

9. “Sigurimi i shërbimeve” është sigurimi apo realizimi i shërbimit publik që korrespondon me objektin e koncesionit/partneritetit publik privat dhe me kërkesat e specifikuara nga autoriteti ose enti kontraktues.

10. “Objekti i koncesionit/partneritetit publik privat” janë veprat publike dhe/ose shërbimet publike të siguruara në bazë të një marrëveshjeje koncesioni/partneritetit publik privat në çdonjërin nga sektorët e përcaktuar në këtë ligj.

11. “Koncesionari” është operatori ekonomik ose subjekti për qëllime të veçanta, me të cilin autoriteti ose enti kontraktues ka nënshkruar një kontratë koncesioni.

12. “Subjekti për qëllime të veçanta (SPV)” është:

a) një person juridik privat, me seli në Republikën e Shqipërisë, i krijuar me kërkesë të autoritetit ose entit kontraktues nga operatori ekonomik i zgjedhur si ofertuesi më i suksesshëm, me të cilin lidhet kontrata;

b) një formë e partneritetit publik privat, për krijimin e një entiteti të përbashkët të partnerit publik dhe atij privat, që kryen punë apo shërbime në bazë të një kontrate koncesioni/partneriteti publik privat dhe ku partneri privat, përveç kontributit në kapital apo asete, kontribuon edhe me pjesëmarrje aktive në menaxhimin e kontratës së koncesionit/partneritetit publik privat. Kontributet e thjeshta të kapitalit nga investitorët privatë në kompanitë shtetërore nuk përbëjnë SPV.

13. “Projekte” janë një sërë aktivitete të ndërlidhura, që ndërmerren në një mënyrë të caktuar, me qëllimin e arritjes së objektivave të qartë brenda një periudhe kohore të specifikuar dhe brenda një kuadri të caktuar financiar.

14. “Objekti” është rezultati i ndërtimit ose i një infrastrukture ekzistuese publike në posedim, që përdoret ose zotërohet nga koncesionari/partneri privat ose një infrastrukture publike që do të realizohet në zbatim të kontratës së koncesionit/partneritetit publik privat dhe që mund të sigurohet për të mirën e publikut ose të ndonjë pjese të publikut.

15. “Propozim i pakërkuar” është propozimi për të marrë përsipër projekte koncesioni, i cili nuk ka ardhur në përgjigje të një kërkesë të bërë nga autoriteti ose enti kontraktues, në kuadër të një procedure përzgjedhëse konkurruese.

16. “Mbështetja financiare” është lloji i mbështetjes monetare ose jo monetare dhe/ose financimi i dhënë nga sektori publik, duke përfshirë, por pa u kufizuar, subvencione, garanci financiare apo të tjera, kontribute kapitale dhe transferim të të drejtave të pronësisë.

17. “Vlera e parasë” është një term, i cili përdoret për të përcaktuar nëse autoriteti ose enti kontraktues ka marrë fitimet maksimale të mundshme nga punët apo shërbimet e dhëna me koncesion/partneritet publik privat. Ky term nuk kufizohet në masën e vlerës së parasë së punëve/shërbimeve, por përfshin, gjithashtu, edhe vlerësimin e cilësisë, kostos dhe shfrytëzimin e burimeve, përshtatshmërinë me qëllimin dhe objektivin e kontratës, kohën dhe mundësinë për të vendosur nëse të gjitha këto elemente të kombinuara përbëjnë vlerën me të mirë ekonomike.

18. “Kontraktues” është çdo person, fizik ose juridik, ent publik ose grup personash dhe/ose organesh të tilla që ofrojnë në treg, respektivisht, realizimin e punëve dhe/ose të punëve dhe shërbimeve.

19. “Operator ekonomik” është kontraktuesi, sipërmarrësi i punëve ose shërbimeve.

20. “Kandidat” nënkupton një operator ekonomik që ka paraqitur një kërkesë për shprehje interesi ose është ftuar për të marrë pjesë në një procedurë konkurruese të dhënies me koncesion/partneritet publik privat.

21. Ofertues është operatori ekonomik, i cili ka paraqitur një ofertë në një procedurë konkurruese të dhënies me koncesion/partneritet publik privat.

22. “Dokumentet e tenderit” janë dokumentet që autoriteti ose enti kontraktues ua vë në dispozicion kandidatëve dhe ofertuesve të mundshëm për të përshkruar ose përcaktuar elementë të koncesionit/partneritetit publik privat ose procedurës, duke përfshirë njoftimin e kontratës, specifikimet teknike, kushtet e propozuara të kontratës, formularët për paraqitjen e dokumenteve nga kandidatët dhe ofertuesit, informacionin për detyrimet e përgjithshme të zbatueshme dhe çdo dokument shtesë.

23. “Mjet elektronik” nënkupton pajisje elektronike për përpunimin (përfshirë kompresimin dixhital) dhe ruajtjen e të dhënave, të cilat transmetohen, dërgohen dhe merren nëpërmjet telit, radios, mjeteve optike ose mjeteve të tjera elektromagnetike.

24. “E drejtë ekskluzive” nënkupton një të drejtë të dhënë nga një autoritet kompetent me anë të një ligji, rregulloreje ose dispozite administrative të shpallur, efekti i së cilës është të kufizojë ushtrimin e një aktiviteti në një operator të vetëm ekonomik dhe që ndikon në mënyrë thelbësore në aftësinë e operatorët e tjerë ekonomikë për të kryer një aktivitet të tillë.

25. “E drejtë e veçantë” nënkupton një të drejtë të dhënë nga një autoritet kompetent me anë të një ligji, rregulloreje ose dispozite administrative të shpallur, efekti i së cilës është të kufizojë ushtrimin e një aktiviteti në dy ose më shumë operatorë ekonomikë dhe që ndikon në mënyrë thelbësore aftësinë të operatorëve të tjerë ekonomikë për të kryer një aktivitet të tillë.

26. “Kontratë koncesioni” është një kontratë e nënshkruar ndërmjet autoritetit kontraktues në njërën anë dhe operatorit ekonomik të zgjedhur si ofertuesi më i suksesshëm apo subjektit, për qëllime të veçanta (SPV), i themeluar nga operatori ekonomik në fjalë, kontratë e cila përmban përcaktimet që rregullojnë të drejtat dhe detyrimet në lidhje me koncesionin e dhënë.

27. “Kontratë e partneritetit publik privat” ka kuptimin e një kontrate pune publike apo kontrate të shërbimit publik, që plotëson kushtet, të cilat e përcaktojnë atë si një partneritet publik privat, sikurse është rregulluar në këtë ligj dhe që nënshkruhet ndërmjet autoritetit kontraktues në njërin anë dhe operatori ekonomik të zgjedhur si ofertuesi më i suksesshëm.

28. “Inovacion” është realizimi i një produkti, shërbimi ose procesi të ri ose të përmirësuar ndjeshëm, duke përfshirë, por pa u kufizuar në proceset e prodhimit, ndërtimit ose konstruksionit, në një metodë të re marketingu, ose në një metodë të re organizative në praktikën e punës, në organizimin e vendit të punës ose në marrëdhëniet e jashtme.

29. “Shërbime utilitare” janë shërbime drejtpërdrejt të lidhura me sektorët utilitarë.

30. “Sektorët utilitarë” janë sektorët e shërbimit ujor, energjetik, të transportit dhe atij postar.

Neni 4

Fusha e zbatimit të koncesioneve/partneriteteve publike private

1. Koncesionet/partneritetet publike private mund të jepen për realizimin e punimeve dhe/ose ofrimin e shërbimeve për sektorët dhe qëllimet e mëposhtme:

- a) transport (sistemin e hekurudhave, transportin hekurudhor, portet, aeroportet, rrugët, tunelet, urat, parkimin, transportin publik);
- b) prodhim dhe shpërndarje e energjisë elektrike dhe energjisë për ngrohje;
- c) prodhim dhe shpërndarje e ujit, trajtim, mbledhje, ujitje, drenazhim, pastrim i kanaleve dhe digave;
- ç) menaxhim i mbeturinave, duke përfshirë mbledhjen, trajtimin, transferimin dhe depozitimin e tyre;
- d) telekomunikacion;
- dh) shkencë dhe arsim;
- e) turizëm, argëtim dhe hoteleri;
- ë) kulturë dhe sport;
- f) shëndetësi;
- g) shërbime sociale;
- gj) burgje dhe infrastrukturë gjyqësore;
- h) rehabilitim i tokës dhe pyjeve;
- i) parqe industriale, miniera dhe infrastrukturë të ngjashme për mbështetjen e biznesit;
- j) strehim;
- k) godina të administratës publike, teknologji e informacionit dhe infrastrukturë e bazës së të dhënave;
- l) shpërndarje e gazit natyror;
- ll) rehabilitim dhe zhvillim urban dhe suburban;
- m) ndriçimi publik në territorin e njësive administrative vendore;
- n) bujqësi;
- nj) kontrata të tjera në sektorët utilitar.

2. Këshilli i Ministrave, me propozimin e ministrave të linjës apo propozime që këto i marrin nga autoritete të njësive të qeverisjes vendore apo të organeve qendrore të politikës së koncesioneve/partneriteteve publike private, vendos për koncesionet/partneritetet publike private që zbatohen në sektorë të tjerë.

3. Në raste të veçanta, Këshilli i Ministrave mund të ofrojë koncesione për operatorët ekonomikë, vendas apo ndërkombëtarë, me çmimin simbolik 1 euro.

Neni 5

Përfshirje të përgjithshme

1. Ky ligj nuk zbatohet për koncesionet/partneritetet publike private, në rastet e mëposhtme:
 - a) për kontratat vlera e përlllogaritur e të cilave është nën kufirin e ulët monetar;
 - b) kur realizimi i tyre duhet të shoqërohet me masa të veçanta të sigurisë, në përputhje me ligjet, rregulloret ose dispozitat administrative në fuqi apo kur një gjë e tillë kërkohet nga mbrojtja e interesave thelbësorë të shtetit;
 - c) për blerjen ose marrjen me qira, me çfarëdo mjetesh financiare, të pasurisë së paluajtshme ose të të drejtave të lidhura me to. Megjithatë, kontratat e shërbimeve financiare, të nënshkruara në të njëjtën kohë para ose pas kontratës së blerjes ose të qirasë, në çfarëdo forme, i nënshtrohen këtij ligji;
 - ç) blerjen, zhvillimin, prodhimin ose bashkëprodhimin e materialit programor të destinuar për shërbime mediatike audiovizive ose shërbime mediatike radiofonike, që jepen nga ofruesit e shërbimeve mediatike audiovizive ose radiofonike, ose koncesionet për kohën e transmetimit ose ofrimit të programit, që i jepen ofruesit të shërbimeve mediatike audiovizive ose radiofonike;
 - d) për koncesionet, të cilat u nënshtrohen rregullave të ndryshme dhe që jepen në përputhje me rregullat procedurale të veçanta të organizatave ndërkombëtare ose të institucionve financiare ndërkombëtare, ku koncesionet në fjalë financohen plotësisht nga ato organizata ose institucione. Në rastin e koncesioneve të bashkëfinancuara në pjesën më të madhe nga një organizatë ndërkombëtare ose institucion financiar ndërkombëtar, palët të bien dakord për procedurat e zbatueshme të prokurimit;
 - dh) për shërbimet e arbitrazhit dhe të pajtimit;
 - e) për shërbimet financiare, në lidhje me nxjerrjen, shitjen, blerjen, apo transferimin e titujve ose instrumenteve të tjera financiare, në mënyrë të veçantë, transaksionet nga autoritetet kontraktuese ose entet kontraktuese për të mbledhur para ose kapital;
 - ë) për huatë, pavarësisht nëse janë ose jo të lidhura me emetimin, shitjen, blerjen ose transferimin e titujve ose instrumenteve të tjera financiare;
 - f) Shërbimet e mbrojtjes civile, emergjencave civile dhe shërbimet e parandalimit të rreziqeve që ofrohen nga organizata ose shoqata jofitimprurëse, përveç shërbimeve të transportit me ambulancë;
 - g) Shërbimet e fushatave politike kur jepen nga partitë politike në kuadër të fushatave elektorale;
 - gj) Shërbimet e lotarisë, të dhëna për një operator ekonomik në bazë të një të drejte ekskluzive.
 - h) për shërbimet e transportit ajror;
 - i) për koncesione/partneritete publike private që u nënshtrohen rregullave të ndryshme dhe që janë dhënë në përputhje me marrëveshjet ndërkombëtare, të cilat Republika e Shqipërisë i ka lidhur me një ose disa shtete të tjera, të nënshkruara në pajtim me Traktatin për Funksionimin e Bashkimit Evropian dhe që përfshijnë punë, mallra apo shërbime të destinuara për zbatimin e përbashkët ose përdorimin e projekteve nga ana e vendeve nënshkruese;
 - j) për koncesionin/partneritetin publik privat, në atë masë që ky ligj bie ndesh me një detyrim të shtetit, që është në bazë ose që rrjedh prej një marrëveshjeje me një ose më shumë shtete të tjera a me një organizëm ndërkombëtar, mbizotërojnë dispozitat e kësaj marrëveshjeje. Në të gjitha aspektet e tjera, procedurat dhe parimet e dhënies së koncesionit/partneritetit publik privat rregullohen me këtë ligj;
 - k) për koncesionet e shërbimit publik që një autoritet kontraktues ia ka dhënë një autoriteti tjetër kontraktues ose një shoqatë të autoriteteve kontraktuese, në bazë të një të drejte ekskluzive që ata gëzojnë, sipas legjislacionit në fuqi;
 - l) për ndërtimin dhe shfrytëzimin e burimeve të energjisë së rinovueshme, sipas përcaktimeve të ligjit nr. 24/2023, “Për nxitjen e përdorimit të energjisë nga burimet e rinovueshme”, përveç hidrocentraleve”;
 - ll) koncesionet në fushën e ujit të dhëna për:
 - i. të siguruar ose operuar rrjete fikse të destinuara për të ofruar një shërbim për publikun në lidhje me prodhimin, transportin ose shpërndarjen e ujit të pijshëm;
 - ii. furnizimin me ujë të pijshëm për rrjete të tilla.

m) për koncesionet me njërin ose të dy objektet e mëposhtëm, kur ato lidhen me një veprimtari të përmendur në shkronjën “j” të pikës 1 të këtij neni:

i. projekte inxhinierike hidraulike, ujitje ose kullim të tokës, me kusht që vëllimi i ujit që do të përdoret për furnizimin me ujë të pijshëm të përfaqësojë më shumë se 20% të vëllimit të përgjithshëm të ujit të vënë në dispozicion nga këto projekte ose instalime vaditëse ose kulluese; ose

ii. largimin apo trajtimin e ujërave të zeza.

2. Rastet e përjashtuara, sipas pikës 1 të këtij neni, rregullohen me dispozita të tjera ligjore ose nënligjore.

Neni 6

Licencat dhe lejet

Ky ligj nuk zbatohet për licencat dhe lejet administrative që u jepen operatorëve ekonomikë, autoriteteve kontraktuese, enteve kontraktuese dhe organeve të tjera të sektorit privat apo publik.

Neni 7

Partneriteti publik privat

1. Partneriteti publik privat nënkupton një formë bashkëpunimi afatgjatë, të rregulluar me kontratë, ndërmjet autoritetit kontraktues, domethënë partnerit publik, dhe një ose më shumë operatorëve ekonomikë, domethënë partnerit privat, ku:

a) partneri privat merr përsipër detyrimin për t'u ofruar shërbime publike përdoruesve të shërbimeve brenda fushës së kompetencave të partnerit publik dhe/ose detyrimin për t'i siguruar partnerit publik parakushtet e nevojshme për t'u ofruar shërbimet publike përdoruesve të shërbimeve dhe/ose veprimtaritë brenda fushës së kompetencave të tij;

b) partneri privat, me qëllim që të përmbushë detyrimet e shkronjës “a” të kësaj pike, mund të marrë përsipër:

i) detyrimin që të financojë, të projektojë, të ndërtojë dhe/ose të rindërtojë/të rinovojë objektin e infrastrukturës publike, të operojë dhe të mirëmbajë objektin e infrastrukturës publike të ndërtuar dhe /ose të rindërtuar/të rinovuar rishtazi;

ii) detyrimin që të përdorë, të operojë dhe të mirëmbajë një objekt ekzistues të infrastrukturës publike;

iii) çdo kombinim i detyrimeve të përmendura më lart, për sa kohë që kombinimi i këtyre detyrimeve është për qëllim të përmbushjes së objektivave të përcaktuar në shkronjën “a” të kësaj pike.

c) në kuadër të marrjes përsipër të detyrimeve të parashikuara në shkronjat “a” dhe “b” të kësaj pike, partneri privat zakonisht merr përsipër nivele dhe shtrirje të ndryshme të risqeve, që lidhen me financimin, ndërtimin, kërkesën dhe/ose disponueshmërinë, dhe të tjera si operimi, menaxhimi, mirëmbajtja dhe risqet teknike, varësisht nga forma e partneritetit publik privat dhe varësisht nga përcaktimi, rast pas rasti;

ç) për kohëzgjatjen e partneritetit publik privat çdo partner zakonisht merr përgjegjësinë për rastet e riskut që janë nën sferën e ndikimit të tij ose përgjegjësia ndahet;

d) partneri privat shpërblehet kryesisht, por jo ekskluzivisht, dhe në përputhje me kontratën:

i) duke iu dhënë e drejta për të shfrytëzuar veprat publike dhe/ose shërbimin publik, kryesisht me qëllimin e vendosjes së tarifave ose pagesave nga përdoruesit fundorë dhe konsumatorët ose kjo e drejtë së bashku me mbështetjen financiare;

ii) me pagesat e rregullta të drejtpërdrejta të paguara nga ose në emër të partnerit publik, zakonisht në lidhje me disponueshmërinë e objektit dhe/ose shërbimit të ofruar;

iii) me forma të tjera të mbështetjes financiare, duke përfshirë transferimin e të drejtave materiale dhe të drejtave të tjera reale;

iv) një kombinim i mjeteve të përshkruara më lart.

dh) partneri publik i mundëson partnerit privat kryerjen e aktiviteteve tregtare, të përcaktuara në kontratë së bashku me detyrimet që rrjedhin nga shkronjat “a” dhe “b” të kësaj pike, nëse kjo siguron nivelin e nevojshëm të efikasitetit të kostos së pjesëmarrjes private dhe kthimit të arsyeshëm të investimit, si dhe një vlerë më të mirë të parasë.

2. Përveç kërkesave të përcaktuara në këtë nen, partneriteti publik privat mund të përfshijë krijimin e një subjekti për qëllime të veçanta (SPV) me kapital të përzier, që zotërohet bashkërisht nga partneri publik dhe privat. Nëse kontributet kapitale të partnerit publik janë të tilla që vlera ose ndikimi i tyre eliminojnë transferimin e nevojshëm të risqeve kryesore të natyrshme të projektit te partneri privat, siç rregullohet nga ky ligj, një kontratë apo ndërmarrje e tillë nuk konsiderohet si një partneritet publik privat (PPP).

3. Kontratat e prokurimit publik, që nuk i plotësojnë kushtet e këtij neni, nuk konsiderohen partneritet publik privat. Kushte të tilla nënkuptojnë, por nuk kufizohen vetëm në kohëzgjatjen e kontratës, transferimin e risqeve kryesore të natyrshme dhe mjetet e shpërblimit.

4. Varësisht nga mjetet e shpërblimit, si dhe ndarja e risqeve kryesore të natyrshme, një partneritet publik privat mund të realizohet në një nga format e mëposhtme:

a) si punë publike me koncesion;

b) koncesion i shërbimeve publike;

c) kontratë e punëve publike;

ç) kontratë e shërbimit publik.

5. Procedura për dhënien e kontratave sipas shkronjës “c” dhe “ç” të pikës 4 të këtij neni, bëhet në përputhje me dispozitat përkatëse të ligjit të prokurimit publik, për aq sa nuk parashikohet ndryshe në këtë ligj.

6. Këshilli i Ministrave miraton një dokument strategjik politikash për përcaktimin e sektorëve parësorë për investime të bazuara te partneriteti publik privat, të formave të preferuara të partneritetit publik privat dhe çështje të tjera që lidhen me kuadrin e përgjithshëm të politikave për koncesionet dhe partneritetet publike private në Republikën e Shqipërisë.

Neni 8

Parimet themelore

1. Procedura për dhënien e koncesioneve/partneriteteve publike private zbatohet në përputhje me parimet e transparencës, mosdiskriminimit, proporcionalitetit, efikasitetit, trajtimit të barabartë, reciprocitetit dhe të sigurisë ligjore.

2. Përgatitja e procedurës konkurruese të dhënies me koncesion/PPP, duke përfshirë përlllogaritjen e vlerës, nuk bëhet me qëllimin e përjashtimit nga objekti i këtij ligji ose për të favorizuar ose disavantazhuar në mënyrë të padrejtë një numër operatorësh ekonomikë ose punësh, mallrash ose shërbimesh të caktuara.

Neni 9

Ministria përgjegjëse për ekonominë

Ministria përgjegjëse për ekonominë është institucioni përgjegjës, i cili orienton dhe harmonizon veprimtaritë për zhvillimin e koncesioneve /partneriteteve publike private.

Neni 10

Ministria përgjegjëse për financat

1. Autoriteti i ministrisë përgjegjëse për financat, lidhur me koncesionet/PPP, ushtrohet sipas përcaktimeve në nenet e veçanta të këtij ligji.
2. Ministria përgjegjëse për financat vlerëson dhe miraton paraprakisht të gjitha projektet e koncesionit/PPP, si dhe çdo ndryshim apo transferim të tyre, nga pikëpamja e implikimeve fiskale, individuale apo në grup për shpenzimet buxhetore, deficitin buxhetor, qëndrueshmërinë e borxhit publik dhe detyrimet kontingjente eventuale . Nëse autoriteti ose enti kontraktues nuk e ka shpallur procedurën konkurruese të dhënies me koncesion/PPP brenda 2 viteve nga marrja e miratimit nga ministria përgjegjëse për financat, do të dërgojë studimin e fizibilitetit të rishikuar edhe një herë për miratim.
3. Autoritetet kontraktuese ose entet kontraktuese janë të detyruara që përpara nënshkrimit të kontratës së koncesionit/partneritetit publik privat me operatorin ekonomik të shpallur fitues ta paraqesin atë për vlerësim, në përputhje me kriteret e përcaktuara në pikën 2, të këtij neni, në ministrinë përgjegjëse për financat.
4. Autoritetet kontraktuese ose entet kontraktuese i paraqesin, sa herë që kërkohet, por jo më pak se katër herë në vit, ministrit përgjegjës për financat raporte të përmbledhura të monitorimit të zbatimit të kontratave të koncesionit/ PPP me argumentet dhe shpjegimet përkatëse. Forma, përmbajtja dhe afatet e raporteve të monitorimit përcaktohen me udhëzim të veçantë të ministrit përgjegjës për financat.
5. Bazuar në raportet e monitorimit, të specifikuara në pikën 4, të këtij neni, ministria përgjegjëse për financat mund t'u rekomandojë autoriteteve kontraktuese ose enteve kontraktuese marrjen e masave për përmirësimin e performancës në ofrimin e shërbimeve dhe punëve publike, objekt i këtyre kontratave, si dhe për minimizimin apo eliminimin e risqeve të drejtpërdrejta e të tërthorta që ndikojnë në buxhetin e shtetit.
6. Autoritetet kontraktuese ose entet kontraktuese, brenda gjashtëmujorit të parë të çdo viti, dërgojnë në ministrinë përgjegjëse për financat pasqyrat financiare vjetore të audituara dhe të konfirmuara nga autoritetet tatimore të vitit paraardhës të shoqërive koncesionare.
7. Bazuar në të dhënat e mbledhura në përputhje me pikat 4 dhe 6 të këtij neni, Ministri përgjegjës për financat përgatit një raport vjetor të përmbledhur mbi ecurinë e kontratave aktive të koncesionit/ PPP, si aneks i raportit vjetor të zbatimit të buxhetit, në përputhje me legjislacionin në fuqi për menaxhimin e sistemit buxhetor.
8. Këshilli i Ministrave miraton rregullat për vlerësimin dhe miratimin e projekteve, sipas pikës 2 të këtij neni.

Neni 11

Agjencia e Prokurimit Publik

Agjencia e Prokurimit Publik kryen detyrat e mëposhtme:

- a) kryen publikimin e dokumenteve standarde të tenderit;
- b) përjashton një operator ekonomik, sipas dispozitave të ligjit të prokurimit publik, nga përfitimi i kontratave publike.

Neni 12

Agjencia e Trajtimit të Koncesioneve

1. Agjencia e Trajtimit të Koncesioneve (ATRAKO) është në varësi të ministrit përgjegjës për ekonominë dhe ka për objektiv nxitjen dhe asistencën për autoritetet kontraktuese dhe entet kontraktuese në përgatitjen, vlerësimin dhe negocimin e koncesioneve/partneriteteve publike private.
2. ATRAKO asiston autoritetet kontraktuese dhe entet kontraktuese me qëllim:

- a) përgatitjen e studimit të fizibilitetit;
- b) përgatitjen e dokumenteve të procedurës konkurruese dhe kriterëve të vlerësimit;
- c) vlerësimin e propozimeve dhe përcaktimin e ofertuesit më të mirë;
- ç) kryerjen e negocimeve dhe nënshkrimin e kontratës së koncesionit/partneritetit publik privat;
- d) monitorimin e kontratave të koncesionit/partneritetit publik privat.

3. ATRAKO gjithashtu:

- a) propozon pranë ministrit përgjegjës për ekonominë ndryshimin e legjislacionit në fushën e koncesioneve/partneriteteve publike private, si dhe udhëzimet për zbatimin e dispozitave të këtij ligji;
 - b) monitoron, analizon dhe studion tendencat aktuale europiane dhe globale të njohurive dhe përvojës në fushën e koncesioneve/partneriteteve publike private;
 - c) [harton dokumentet standarde të koncesionit/PPP dhe](#) bashkëpunon me Agjencinë e Prokurimit Publik për publikimin e dokumenteve standarde të tenderit;
 - ç) i propozon për miratim Komitetit të Përzgjedhjes së Projekteve të Koncesionit/Partneritetit Publik Privat kërkesat e autoriteteve ose enteve kontraktuese për mbështetje me ekspertizë të specializuar në hartimin e studimeve të fizibilitetit të projekteve të koncesionit/ partneritetit publik privat;
 - d) i propozon për miratim Komitetit të Përzgjedhjes së Projekteve të Koncesionit/Partneritetit Publik Privat kërkesat e ministrisë përgjegjëse për financat për mbështetje me ekspertizë të specializuar për kryerjen e opionencës së studimeve të fizibilitetit të projekteve të koncesionit/partneritetit publik privat;
 - dh) i propozon për miratim Komitetit të Përzgjedhjes së Projekteve të Koncesionit/Partneritetit Publik Privat kërkesat e autoriteteve ose enteve kontraktuese për mbështetje me ekspertizë të specializuar për kryerjen e opionencës së propozimeve të pakërkua;
 - e) kryen procedurat e përzgjedhjes së konsulentëve të jashtëm, në përputhje me procedurat e prokurimit publik.
4. ATRAKO siguron të ardhura nga shërbimet që ofron, si dhe nga donatorë vendas apo të huaj.
5. Mënyra e organizimit dhe funksionimit, si dhe procedurat e niveli i tarifave të shërbimeve që do të ofrohen nga ATRAKO përcaktohen me vendim të Këshillit të Ministrave.

Neni 13

Komiteti i Përzgjedhjes së Projekteve të Koncesionit/Partneritetit Publik Privat

1. Për përzgjedhjen e projekteve të koncesionit/partneritetit publik privat, të cilat do të mbështeten me ekspertizë të specializuar në hartimin e studimit të fizibilitetit dhe/ose në kryerjen e opionencës së tyre, krijohet Komiteti i Përzgjedhjes së Projekteve të Koncesionit/Partneritetit Publik Privat, organ administrativ kolegjal, i cili kryesohet nga ministri përgjegjës për ekonominë dhe në përbërje të tij ka këta anëtarë:

- a) ministrin përgjegjës për financat;
- b) ministrin përgjegjës për infrastrukturën;
- c) ministrin përgjegjës për energjinë dhe industrinë;
- ç) ministrin përgjegjës për zhvillimin urban;
- d) ministrin përgjegjës për mjedisin.

2. Komiteti fton, rast pas rasti, pa të drejtë vote, përfaqësues nga bota akademike, si dhe titullarët e autoritetit ose entit kontraktues, të cilët kanë fushë të veprimtarisë objektin e projektit të koncesionit/partneritetit publik privat, për të argumentuar kërkesën e tyre.

3. Komiteti shqyrton dhe miraton kërkesat e autoriteteve ose enteve kontraktuese për mbështetjen me ekspertizë të specializuar për hartimin e studimit të fizibilitetit të projekteve të mundshme të koncesionit/partneritetit publik privat.

4. Këshilli Ministrave miraton me vendim rregulloren për mënyrën e funksionimit të tij dhe kriteret për vlerësimin e kërkesave të autoriteteve ose enteve kontraktuese për mbështetje me ekspertizë të specializuar në hartimin e studimit të fizibilitetit të projekteve të mundshme të koncesionit/partneritetit publik privat.

5. Rolin e Sekretariatit të Komitetit e kryen ATRAKO, e cila mundëson të gjithë mbështetjen e nevojshme për mbarëvajtjen e mbledhjeve.

Neni 14

Autoritetet/entet kontraktuese

1. Autoritetet/entet kontraktuese janë institucionet dhe entet, të cilave ky ligj u jep kompetencat për të ndërmarrë një procedurë për dhënien e koncesionit/partneritetit publik privat.

2. Autoritetet kontraktuese janë:

a) institucionet kushtetuese, institucionet e pavarura, institucionet e tjera qendrore dhe njësitë e vetëqeverisjes vendore;

b) çdo ent:

i. i themeluar për të ndjekur një interes të përgjithshëm dhe me karakter joekonomik apo tregtar;

ii. i cili ka personalitet juridik;

iii. i financuar kryesisht nga shteti, autoritetet rajonale apo vendore ose nga ente të tjera publike apo i administruar prej tyre ose me një bord administrativ, menaxherial apo mbikëqyrës, ku më shumë se gjysma e anëtarëve të tyre emërohen nga shteti, autoritetet rajonale ose vendore apo nga entet e tjera publike.

3. Entetet kontraktuese janë institucionet dhe entet e përcaktuara në pikën 2 të këtij neni, të cilët në fushën e tyre të përgjegjësisë kryejnë një nga aktivitetet në sektorët utilitar të përcaktuar në këtë ligj dhe që do të ndërmarrin një procedurë për dhënien e koncesioneve/PPP për ushtrimin e njërit prej këtyre aktiviteve.

4. Kur objekt i kontratës së koncesionit/partneritetit publik privat është fushë e veprimtarisë së më shumë se një autoriteti kontraktues, Këshilli i Ministrave me vendim përcakton autoritetin/entin kontraktues, sipas rastit.

Neni 15

Regjistri i koncesionit/partneritetit publik privat

1. Regjistri i koncesionit/partneritetit publik privat është një bazë të dhënash elektronike e të gjitha kontratave të koncesionit dhe të partneritetit publik privat, të dhëna në Republikën e Shqipërisë.

2. Regjistri i koncesionit/partneritetit publik privat krijohet dhe mbahet nga ATRAKO, në përputhje me dispozitat ligjore në fuqi.

3. Këshilli i Ministrave miraton rregullat për përmbajtjen dhe formën e regjistrit të koncesioneve/partneritetit publik privat.

Neni 16

Konfidencialiteti

1. Përveç rasteve kur parashikohet ndryshe në këtë ligj, të cilit i nënshtrohet autoriteti kontraktues, veçanërisht legjislacioni në lidhje me aksesin në informacion, dhe pa cenuar detyrimet në lidhje me njoftimin e kontratave të koncesionit të shpallura fituese dhe me informacionin për kandidatët dhe ofertuesit e përcaktuar në nenet 25, 39 dhe 47, autoriteti ose enti kontraktues nuk publikon informacionin e përcjellë atij nga operatorët ekonomikë, të cilin ata e kanë caktuar si konfidencial, duke përfshirë, por pa u kufizuar, në sekretet teknike ose tregtare dhe aspektet konfidenciale të

ofertave. Ky nen nuk parandalon publikimin e pjesëve jokonfidenciale të kontratave të lidhura, duke përfshirë çdo ndryshim të mëvonshëm.

2. Operatori ekonomik nuk mund të klasifikojë si konfidencial: çmimin e ofertës, listën e çmimeve, katalogun, informacionin lidhur me kriteret e përzgjedhjes së ofertës, dokumentet publike, fragmente nga regjistrat publikë dhe informacione të tjera që duhet të bëhen publike ose që nuk janë konfidenciale në përputhje me legjislacionin në fuqi.
3. Autoriteti kontraktues ose enti kontraktues, në përputhje me legjislacionin në fuqi, mund t'u imponojë operatorëve ekonomikë kërkesa që synojnë mbrojtjen e natyrës konfidenciale të informacionit që ai vë në dispozicion gjatë gjithë procedurës së dhënies së koncesionit.

Neni 17

Parandalimi i korrupsionit dhe konfliktit të interesit

1. Autoriteti kontraktues ose enti kontraktues është i detyruar të marrë të gjitha masat e nevojshme gjatë zhvillimit të procedurës konkurrese të dhënies me koncesion/PPP, për zbulimin në kohë të korrupsionit dhe eliminimin e pasojave të dëmshme të korrupsionit, si dhe për identifikimin dhe parandalimin të çdo konflikt interesi, me qëllim garantimin e konkurrencës, transparencës dhe të trajtimit të barabartë të kandidatëve dhe ofertuesve.
2. Konflikti i interesit, për qëllimet e këtij ligji, përfshin çdo situatë kur punonjësit e autoritetit kontraktues ose entit kontraktues, të cilët marrin pjesë në zhvillimin e procedurës së dhënies së koncesionit dhe që mund të ndikojnë në rezultatin e kësaj procedure, kanë drejtpërdrejt ose tërthorazi, një interes financiar, ekonomik ose një interes tjetër personal, që mund të cenojë paanshmërinë dhe pavarësinë e tyre në kuadër të procedurës së dhënies së koncesionit.
3. Masat e ndërmarra në lidhje me konfliktin e interesit duhet të jenë në përpjestim me nevojën për të parandaluar një konflikt të mundshëm interesi ose për të shmangur një konflikt interesi të identifikuar.

KREU II

VEPRIMET PËR DHËNIEN E KONCESIONIT/ PARTNERITETIT PUBLIK PRIVAT

Neni 18

Veprimet për dhënien e koncesionit/partneritetit publik privat

1. Veprime për dhënien e një koncesioni/partneriteti publik privat quhen të gjitha aktivitetet e ndërmarra që nga identifikimi i projekteve deri në fazën e lidhjes së kontratës në zbatim të këtij ligji.
2. Autoriteti kontraktues ose enti kontraktues mund të angazhojë këshilltarë të jashtëm për të siguruar mbështetjen e ekspertëve në përgatitjen dhe dhënien e projekteve të koncesionit/partneritetit publik privat.
3. Në rast se autoriteti kontraktues ose enti kontraktues kërkon mbështetjen me ekspertizë të specializuar për hartimin e studimit të fizibilitetit dhe/ose oponencën e projekteve të koncesionit/partneritet publik privat, i drejtohet me kërkesë të argumentuar Agjencisë së Trajtimit të Koncesioneve. Kërkesa duhet të përmbajë argument mbi përshtatshmërinë, nevojën dhe elemente të leverdishmërisë së dhënies së këtij projekti me koncesion/partneritet publik privat, si dhe referencat për ekspertizën e duhur.
4. Këshilli i Ministrave miraton rregulla më të hollësishme në zbatim të këtij neni.

Neni 19

Identifikimi i projekteve të mundshme të koncesionit/partneritetit publik privat

1. Autoriteti kontraktues identifikon dhe shqyrton projektet e mundshme të koncesionit/partneritetit publik privat brenda sferës së kompetencave të tij.
2. Autoriteti kontraktues informohet dhe mund të marrë në shqyrtim projektet e mundshme të koncesionit/partneritetit publik privat të identifikuar apo të propozuara nga:
 - a) Kryeministria;
 - b) autoritetet e tjera kontraktuese të së njëjtës hierarki administrative, organet e qeverisjes qendrore apo vendore;
 - c) institucionet dhe organizatat vendase dhe ndërkombëtare financiare dhe të zhvillimit;
 - ç) institucionet dhe organizatat shkencore vendase dhe ndërkombëtare;
 - d) operatorët ekonomikë nëpërmjet propozimeve të pakërkua vetëm për realizimin e punimeve dhe/ose ofrimin e shërbimeve në: porte, aeroporte, energjinë për ngrohje dhe shpërndarjen e gazit natyror për prodhimin dhe shpërndarjen e energjisë elektrike, me përjashtim të prodhimit e shpërndarjes së energjisë elektrike nga burimet hidrike.

Neni 20

Komisioni i Koncesionit/Partneritetit Publik Privat

1. Për shqyrtimin dhe dhënien e koncesionit /partneritetit publik privat, autoriteti ose enti kontraktues, në koordinim me ATRAKO-n, krijon komisionin e koncesionit/partneritetit publik privat.
2. Anëtarët e komisionit duhet të jenë me profesion jurist, ekonomist, profesion teknik dhe profesione nga fusha të tjera përkatëse, në varësi të objektit dhe karakteristikave të koncesionit /partneritetit publik privat.
3. Numri i anëtarëve në komisionin e dhënies së koncesionit/partneritetit publik privat është tek, por jo më pak se 5 anëtarë. Për projekte koncesioni/partneriteti publik privat, objekti i të cilave është i ngjashëm në natyrë, mund të krijohet një komision i vetëm.
4. Komisioni i koncesionit/partneritetit publik privat kryen detyrat e mëposhtme:
 - a) harton raportin përmbledhës mbi bazën e të cilit autoriteti merr vendimin për shtyrjen, refuzimin e plotë ose vazhdimin e procedurave,
 - b) harton studimin e fizibilitetit për koncesionin/partneritetin publik privat, nëse një i tillë nuk është hartuar dhe miratuar më parë sipas legjislacionit në fuqi për menaxhimin e investimeve publike,
 - c) përcakton procedurën e zbatueshme për dhënien e koncesionit/partneritetit publik privat dhe harton dokumentacionin e tenderit,
 - ç) shqyrton dhe vlerëson ofertat e pranuar dhe/ose kërkesat për pjesëmarrje, që janë dorëzuar;
 - d) formulon propozimin e përzgjedhjes së ofertës së suksesshme ose propozimin e vendimit për ndërprerjen e procedurës së dhënies së koncesionit/partneritetit publik privat, si dhe një shpjegim të tyre,
 - dh) kryen të gjitha aktivitetet e tjera që kërkohen për zbatimin e procedurës së koncesionit /partneritetit publik privat, në përputhje me legjislacionin në fuqi.
5. Komisioni i dhënies së koncesionit /partneritetit publik privat dokumenton në mënyrë të përshtatshme të gjithë proceset e punës së tij.

Neni 21

Studimi i fizibilitetit të koncesionit/partneritetit publik privat

1. Studimi i fizibilitetit për koncesionin/partneritetin publik privat përmban, në mënyrë të veçantë:
 - a) përmbledhjen operacionale dhe përshkrimin e përgjithshëm të projektit;

- b) analizat teknike, financiare, ligjore dhe ekonomike që përfshijë patjetër detajimin e investimeve të planifikuara, kostot e mirëmbajtjes, amortizimin dhe ndikimet e inflacionit të pritshëm;
 - c) studimet mjedisore dhe implikimet në natyrë;
 - ç) anekset shoqëruese, shtesat e kërkuara, konkluzionet dhe rekomandimet.përcaktimin e llojit dhe objektin e koncesionit/partneritetit publik privat;
 - d) vlerësimin e risqeve të drejtpërdrejta financiare dhe ndikimin në buxhetin e qeverisë qendrore dhe vendore;
 - dh) vlerën e parashikuar të kontratës;
 - e) vlerësimet në lidhje me kriteret e zgjedhjes dhe të dhënies së koncesionit/partneritetit publik privat;
 - ë) kohëzgjatjen e propozuar të kontratës, si edhe çdo informacion tjetër të nevojshëm për përgatitjen e dokumentacionit të tenderit
2. Në studimin e fizibilitetit merren parasysh në veçanti interesi publik, ndikimi në mjedis dhe mbrojtja e mjedisit, qëndrueshmëria, përshtatshmëria financiare e projektit, treguesit e vlerës së parasë, harmonizimi i projektit me objektivat kombëtarë dhe sektorialë strategjikë, risqet direkte dhe indirekte financiare dhe ndikimet në buxhetin qendror dhe në atë të qeverisjes vendore, mbështetja e nevojshme financiare, realizueshmëria teknike dhe tregtare, si dhe interesi i tregut dhe aftësia për të tërhequr operatorët e interesuar ekonomikë dhe mbështetësit financiarë.
 3. Përpara shpalljes së procedurës së dhënies me koncesion/partneritet publik privat, autoritetet kontraktuese dhe entet kontraktuese dërgojnë në ministrinë përgjegjëse për financat për miratim paraprak studimin e fizibilitetit, si dhe çdo ndryshim të mëtejshëm të tij, së bashku me projekt kontratën e ndarë në pjesën e panegociueshme dhe të negociueshme. Ministria përgjegjëse për financat e vlerëson dhe miraton studimin së bashku me projekt kontratën në përputhje me kriteret e përcaktuara në pikën 2, të nenit 10, të ligjit.
 4. Pika menjëherë më sipër nuk zbatohet për studimet e fizibilitetit të miratuar sipas legjislacionit në fuqi për menaxhimin e investimeve publike. Në cdo rast autoritetet kontraktuese dhe entet kontraktuese dërgojnë në ministrinë përgjegjëse për financat projekt kontratës e ndatë në pjesën e panegociueshme dhe të negociueshme.
 5. Rregullat e posaçme për hartimin dhe miratimin e studimit të fizibilitetit për projekte të koncesionit/partneritetit publik privat të cilat kërkojnë miratim sipas legjislacionit në fuqi për menaxhimin e investimeve publike miratohen me Vendim të Këshillit të Ministrave, me propozimin e ministrisë përgjegjëse për financat.

Neni 22

Kufiri monetar

1. Për qëllime të këtij ligji, zbatohet një kufi monetar.
2. Kufiri minimal monetar miratohet me Vendim të Këshillit të Ministrave.

Neni 23

Llogaritja e vlerës së koncesionit/partneritetit publik privat

1. Autoriteti kontraktues llogarit vlerën e parashikuar të koncesionit/partneritetit publik privat si xhiro totale e koncesionarit të krijuar gjatë kohëzgjatjes së kontratës, pa TVSH, e vlerësuar nga autoriteti kontraktues ose enti kontraktues për punët dhe shërbimet që janë objekt i koncesionit/partneritetit publik privat, si dhe për mallrat që lidhen me këto punë dhe shërbime.

2. Për qëllim të pikës 1 të këtij neni, nëse vlera e koncesionit/partneritetit publik privat në kohën e dhënies është më shumë se 20 % më e lartë se vlera e tij e parashikuar, vlerësimi i vlefshëm është vlera e koncesionit/partneritetit publik privat në kohën e dhënies së tij.
3. Ky vlerësim është i vlefshëm në momentin kur dërgohet njoftimi i koncesionit/partneritetit publik privat ose në momentin kur autoriteti kontraktues ose enti kontraktues fillon procedurën e dhënies së koncesionit/partneritetit publik privat.
4. Vlera e parashikuar e koncesionit/partneritetit publik privat llogaritet në bazë të të dhënave që përmban studimi i fizibilitetit përkatës të koncesionit/partneritetit publik privat.
5. Vlera e parashikuar e koncesionit llogaritet duke përdorur një metodë objektive të përcaktuar në dokumentet e koncesionit. Gjatë llogaritjes së vlerës së parashikuar të koncesionit, autoritetet kontraktuese dhe entet kontraktuese, sipas rastit, marrin parasysh në veçanti:
 - a) vlerën e çdo forme opsioni dhe çdo zgjatje të kohëzgjatjes së koncesionit;
 - b) të ardhurat nga pagesa e tarifave dhe gjobave nga përdoruesit e punimeve ose shërbimeve të ndryshme nga ato të mbledhura për llogari të autoritetit kontraktues ose entit kontraktues;
 - c) pagesat ose çdo avantazh financiar në çfarëdo forme të bëra nga autoriteti kontraktues ose enti kontraktues ose çdo autoritet tjetër publik për koncesionarin, duke përfshirë kompensimin për përmbushjen e një detyrimi për shërbimin publik dhe subvencionet e investimeve publike;
 - ç) vlerën e granteve ose të çdo përfitimi tjetër financiar, në çfarëdo forme, nga palët e treta për realizimin e koncesionit;
 - d) të ardhurat nga shitja e çdo prone që është pjesë e koncesionit;
 - dh) vlerën e të gjitha mallrave dhe shërbimeve që vihen në dispozicion të koncesionarit nga autoritetet kontraktuese ose entet kontraktuese, me kusht që ato të jenë të nevojshme për kryerjen e punimeve ose ofrimin e shërbimeve;
 - g) çdo çmim ose pagesë për kandidatët ose ofertuesit.
6. Zgjedhja e metodës së përdorur për llogaritjen e vlerës së parashikuar të një koncesioni/partneriteti publik privat nuk bëhet me qëllim të përjashtimit të tij nga fusha e zbatimit të këtij ligji. Koncesioni/partneritetit publik privat nuk nën-ndahet me qëllim që të mos hyjë në objektin e këtij ligji, përveç rasteve kur justifikohet nga arsye objektive.
7. Vlera e parashikuar e kontratës së partneritetit publik privat në formën e kontratës së punës ose shërbimit publik sipas nenit 7 të ligjit llogaritet sipas përcaktimeve në legjislacionin e prokurimit publik.
8. Kur një punë ose shërbim i propozuar mund të rezultojë në dhënien e koncesioneve në formën e loteve të veçanta, do të merret parasysh vlera totale e vlerësuar e të gjithë këtyre loteve.
9. Kur vlera e agreguar e loteve është e barabartë ose e kalon kufirin monetar të përcaktuar me Vendim të Këshillit të Ministrave, atëherë do të zbatohen rregullat e përcaktuara në këtë ligj për dhënien e secilit lot.

Neni 24

Dokumentet e tenderit

1. Dokumentet e tenderit hartohen dhe trajtohen nga autoriteti/enti kontraktues, në përputhje me dispozitat përkatëse të këtij ligji.
2. Rregulla më të hollësishme për çështjet e përcaktuara në pikën 1 të këtij neni, miratohen me vendim të Këshillit të Ministrave.
3. Pa cenuar pikën 1 të këtij neni, në dokumentet e tenderit për procedurën për dhënien e koncesionit/partneritetit publik privat mund të përfshihet informacion shtesë, sipas përcaktimeve në akte të tjera ligjore dhe nënligjore.

Neni 25

Shërbime sociale dhe shërbime të tjera specifike

1. Koncesionet për shërbime sociale dhe shërbime të tjera specifike i nënshtrohen vetëm detyrimeve të përcaktuara në pikën 2 dhe 3 të këtij neni.
2. Llojet e shërbimeve sipas pikës 1 të këtij neni, përcaktohen me Vendim të Këshillit të Ministrave.
3. Autoriteti kontraktues bën të ditur synimin për dhënien e planifikuar të koncesionit të shërbimeve të përmendura në pikën 1 nëpërmjet publikimit të një njoftimi paraprak të informacionit. Ky njoftim duhet të përmbajë minimalisht informacionin e mëposhtëm:
 - a) emrin, numrin e identifikimit, adresën duke përfshirë numrin e telefonit, faksit, e-mail-in dhe adresën e internetit të autoritetit ose të entit kontraktues.
 - b) kur është e përshtatshme, e-mail-in ose adresën e internetit në të cilën do të jenë të disponueshme specifikimet dhe çdo dokument mbështetës.
 - c) llojin e autoritetit ose të entit kontraktues dhe veprimtarinë kryesore të ushtruar.
 - ç) kodet CPV; kur kontrata është e ndarë në lote, ky informacion duhet të jepet për çdo lot.
 - d) Përshkrimin e shërbimeve, renditja treguese e madhësisë ose e vlerës.
 - dh) kushtet për pjesëmarrje.
 - e) kur është e mundshme, afatin ose afatet kohore për kontaktimin me autoritetin ose entin kontraktues në funksion të pjesëmarrjes.
 - ë) kur është e mundshme, përshkrim të shkurtër të veçorive kryesore të procedurës së dhënies së kontratës që do të zbatohet.
 - f) Çdo informacion tjetër të rëndësishëm.
4. Autoritetet ose entet kontraktuese publikojnë njoftimin e fituesit bazuar mbi rezultatet e procedurës së dhënies së koncesionit. Ky njoftim duhet të përmbajë informacionin minimal të mëposhtëm:
 - a) emrin, numrin e identifikimit, adresën duke përfshirë numrin e telefonit, faksit, e-mail-in dhe adresën e internetit të autoritetit ose të entit kontraktues.
 - b) llojin e autoritetit ose të entit kontraktues dhe veprimtarinë kryesore të ushtruar.
 - c) kodet CPV; kur kontrata është e ndarë në lote, ky informacion duhet të jepet për çdo lot.
 - ç) Një përshkrim të objektit të koncesionit.
 - d) Numrin e ofertave të marra.
 - dh) Vlerën e ofertës së suksesshme, duke përfshirë tarifat dhe çmimet.
 - e) Emrin dhe adresën e telefonit, numrin e faksit, adresën e e-mail-it dhe adresën e internetit të operatorit apo operatorëve të suksesshëm ekonomik.
 - ë) Çdo informacion tjetër të rëndësishëm.
5. Njoftimi i kontratës dhe njoftimi për dhënien e kontratës për shërbimet sociale dhe shërbimet e tjera specifike, të përcaktuara në këtë nen, shpallen në një formular standard të përcaktuar me vendim të Këshillit të Ministrave dhe është pjesë e dokumenteve standarde të tenderit.
6. Njoftimi i kontratës shpallen në mënyrë elektronike në platformën elektronike të prokurimit dhe në Buletinin e Prokurimit Publik.

Neni 26

Kontratat e përziera

1. Kontratat e përziera përfshijnë koncesionet/PPP, objekti i të cilëve përbëhet nga kryerja e punimeve dhe sigurimi i shërbimeve.
2. Kontrata e përzier e përmendur në pikën 1 të këtij neni, e cila përfshin disa lloje koncesionesh/PPP të cilat nuk mund të ndahen, jepet në mënyrën dhe në përputhje me procedurën, që zbatohet për objektin kryesor të kontratës.
3. Kontrata e përzier sipas përcaktimit në pikën 1 të këtij neni, identifikohet si koncesion/PPP i punëve publike ose koncesion/PPP i shërbimit publik, në varësi nëse puna që do të kryhet është

objekti kryesor i kontratës apo nëse puna është thjesht karakteristike për shërbimin publik që është objekt i kontratës.

4. Në rastin e një koncesioni/PPP, objekti i të cilit janë dy ose më shumë shërbime të ndryshme, objekti kryesor i koncesionit do të përcaktohet në varësi se cila nga vlerat e parashikuara të këtyre shërbimeve është më e lartë.

5. Në rastin e kontratave të përziera që përmbajnë elementet e koncesionit/partneritetit publik privat dhe elementet e kontratës së prokurimit publik, do të zbatohet:

- a) ligji i prokurimit publik, nëse vlera e parashikuar e pjesës së kontratës që mbulohet nga ky ligj, është e barabartë ose më e madhe se kufiri i lartë monetar, e llogaritur në përputhje me parashikimet e këtij ligji;
- b) ky ligj, nëse vlera e parashikuar e pjesës së kontratës që mbulohet nga ligji i prokurimit publik, është më e vogël se kufiri i lartë monetar, e llogaritur në përputhje me parashikimet e ligjit të prokurimit publik.

Neni 27

Koncesionet e rezervuara

Autoritetet ose entet kontraktuese mund t'u rezervojnë të drejtën e pjesëmarrjes në procedurat e dhënies së koncesioneve operatorëve ekonomikë, qëllimi kryesor i të cilëve është integrimi social dhe profesional i personave me aftësi të kufizuara ose personave në nevojë ose të parashikojnë që këto kontrata të zbatohen në kontekstin e programeve për punësimin e personave me aftësi të kufizuara, me kusht që të paktën 30% e punonjësve të këtyre operatorëve ekonomikë ose programeve janë persona me aftësi të kufizuara ose persona në nevojë, sipas parashikimeve të legjislacionit në fuqi.

Neni 28

Shërbimet e kërimit dhe zhvillimit

1. Ky ligj zbatohet vetëm për koncesionet e shërbimeve të kërimit dhe zhvillimit, për të cilët plotësohen të dy kushtet e mëposhtme:

- a) përfitimet i përkasin ekskluzivisht autoritetit kontraktues ose entit kontraktues që t'i përdorë për kryerjen e punëve të veta; dhe
 - b) shërbimi i ofruar shpërblehet tërësisht nga autoriteti kontraktues ose enti kontraktues.
2. Shërbimet sipas pikës 1 të këtij neni, përcaktohen me Vendim të Këshillit të Ministrave.

Neni 29

Operatorët ekonomikë

1. Operatorët ekonomikë mund të jenë persona fizikë ose juridikë dhe bashkime të përkohshme operatoorësh.
2. Personave juridikë mund t'u kërkohej të tregojnë, në ofertë ose në kërkesën për pjesëmarrje emrat dhe kualifikimet përkatëse profesionale të personelit që do të jetë përgjegjës për zbatimin e kontratës në fjalë.
3. Grupet e operatorëve ekonomikë, duke përfshirë bashkimet e përkohshme, mund të marrin pjesë në procedurat e dhënies së koncesionit. Autoritetet kontraktuese ose entet kontraktuese nuk u kërkojnë atyre një formë të caktuar ligjore për të paraqitur një ofertë ose kërkesë për pjesëmarrje.
4. Kur është e nevojshme, autoritetet ose entet kontraktuese mund të sqarojnë në dokumentet e tenderit se si grupet e operatorëve ekonomikë duhet të plotësojnë kërkesat për gjendjen ekonomike dhe financiare ose aftësinë teknike dhe profesionale të përmendura në nenin 37 të këtij ligji, me kusht që kjo të justifikohet nga arsye objektive dhe të jetë proporcionale.

5. Kur është e nevojshme, autoritetet ose entet kontraktuese mund të vendosin kushte standarde për mënyrën se si grupet e operatorëve ekonomikë duhet të përmbushin kërkesat e përcaktuara në pikën 4 të këtij neni.
6. Të gjitha kushtet për realizimin e një koncesioni nga grupe të tilla operatorësh ekonomikë, të cilat janë të ndryshme nga ato të vendosura për pjesëmarrësit individualë, justifikohen gjithashtu nga arsye objektive dhe janë proporcionale.
7. Pavarësisht përcaktimeve të pikës 1 dhe 3, autoritetet ose entet kontraktuese mund t'u kërkojnë grupeve/bashkimeve të operatorëve ekonomikë që të marrin një formë ligjore specifike pasi t'u jepet kontrata, siç parashikohet në nenin 68 të këtij ligji, në masën që ky ndryshim është i nevojshëm për realizimin e kënaqshëm të kontratës.
8. Këshilli i Ministrave miraton rregulla më të hollësishme në zbatim të këtij neni.

KREU III

PROCEDURA PËR DHËNIEN E KONCESIONEVE

Neni 30

Rregulla dhe parime të përgjithshme

1. Procedura konkurruese për dhënien e koncesioneve/partneritet publik privat fillon me miratimin e urdhrin përkatës nga autoriteti ose enti kontraktues, pasi të jetë miratuar studimi i fizibilitetit nga ministria përgjegjëse për financat dhe përfundon me publikimin e njoftimit të fituesit për dhënien e kontratës ose me publikimin e njoftimit të anulimit të procedurës.
2. Autoriteti ose enti kontraktues organizon procedurën për përzgjedhjen e fituesit të koncesionit/PPP në përputhje me këtë ligj.
3. Organizimi i procedurës së dhënies së koncesionit/PPP duhet të respektojë parimet e përcaktuara në nenin 8 të këtij ligji. Në veçanti, gjatë procedurës së dhënies së koncesionit/PPP, autoriteti ose enti kontraktues nuk duhet të japë informacion në mënyrë diskriminuese që mund t'u japë disa kandidatëve ose ofertuesve një avantazh ndaj të tjerëve.
4. Autoriteti ose enti kontraktues merr masat e duhura për të siguruar që gjatë zbatimit të kontratave të koncesioneve/partneriteteve publike private operatorët ekonomikë të respektojnë detyrimet që zbatohen në fushat e së drejtës mjedisore, sociale dhe të punës, të përcaktuara nga e drejta e Bashkimit Evropian, e drejta kombëtare dhe e drejta ndërkombëtare e detyrshme për t'u zbatuar nga Republika e Shqipërisë.
5. Rregulla më të hollësishme për zhvillimin e procedurave konkurruese për dhënien me koncesion përcaktohen me vendim të Këshillit të Ministrave.

Neni 31

Mjetet e komunikimit

1. Gjatë procedurës së dhënies së kontratës me koncesion/PPP, autoriteti ose enti kontraktues mund të shkëmbejë informacion me operatorin ekonomik, duke përdorur një ose disa nga mjetet e mëposhtme të komunikimit:
 - a) mjete elektronike
 - b) postë ose faks
 - c) komunikimin verbal, të cilin autoriteti kontraktues është i detyruar ta regjistrojë me shkrim.
 - ç) dërgim dorazi i vërtetuar me dokument.
2. Mjetet e zgjedhura të komunikimit duhet të jenë përgjithësisht të disponueshme dhe jodiskriminuese dhe nuk duhet të kufizojnë aksesin e operatorëve ekonomikë në procesin e dhënies së koncesioneve. Mjetet dhe pajisjet e përdorura për komunikim me mjete elektronike, si

dhe karakteristikat e tyre teknike, duhet të korrespondojnë me produktet e teknologjisë së informacionit dhe komunikimit në përdorim të përgjithshëm. Rregullat dhe procedurat për këtë formë komunikimi përcaktohen me vendim të Këshillit të Ministrave.

3. Në çdo komunikim, shkëmbim dhe ruajtje informacioni, autoriteti ose enti kontraktues siguron ruajtjen e integritetit të të dhënave dhe konfidencialitetin e kërkesave për pjesëmarrje dhe ofertave.

Neni 32

Nomenklaturat

Çdo referencë për nomenklaturat në kontekstin e dhënies së kontratave të koncesioneve/partneriteteve publike private do të bëhet duke përdorur Fjalorin e Përbashkët të Prokurimit (CPV), i cili miratohet me vendim të Këshillit të Ministrave.

Neni 33

Njoftimi i kontratës së koncesionit

1. Autoriteti ose enti kontraktues bën të njohur qëllimin e tij për të dhënë një koncesion me anë të një njoftimi.
2. Njoftimi i kontratës duhet të përfshijë, minimalisht informacionin e mëposhtëm:
 - a) emrin, numrin unik të identifikimit, adresën duke përfshirë numrin e telefonit, faksit, e-mail-in dhe adresën e internetit të autoritetit kontraktues ose të entit kontraktues;
 - b) llojin e autoritetit ose të entit kontraktues dhe veprimtarinë kryesore të ushtruar;
 - c) vendndodhjen e aktivitetit të koncesionit/ partneritetit publik privat që do të ndërmerret;
 - ç) kohëzgjatjen e kontratës së koncesionit/ partneritetit publik privat;
 - d) vlerën e parashikuar e kontratës së koncesionit, e shoqëruar me studimin e fizibilitetit të hartuar nga autoriteti kontraktues ose enti kontraktues;
 - dh) kur është e përshtatshme, e-mail-in ose adresën e internetit në të cilën do të jenë të disponueshme pa pagesë dokumentet e tenderit;
 - e) kodet CPV; kur kontrata është e ndarë në lote, ky informacion duhet të jepet për çdo lot;
 - ë) Kushtet për pjesëmarrje, duke përfshirë:
 - i. kur është e përshtatshme, tregues nëse koncesioni është i kufizuar në punëtori të mbrojtura, ose nëse ekzekutimi i tij është i kufizuar në kuadrin e programeve të mbrojtura të punës;
 - ii. kur është e përshtatshme, tregues nëse ofrimi i shërbimit është i rezervuar me ligj, rregullore ose dispozitë administrative për një profesion të caktuar; referencë në ligjin, rregulloren ose dispozitën administrative përkatëse;
 - iii. një listë dhe përshkrim të shkurtër të kriterëve të përzgjedhjes kur është e aplikueshme; nivelet minimale të standardeve që mund të kërkojnë; tregimi i informacionit të kërkuar (vetëdeklarimet, dokumentacioni);
 - f) afatin e fundit për dorëzimin e ofertave;
 - g) adresën në të cilën do të dorëzohen ofertat;
 - gj) gjuhën/gjuhët në të cilat duhet të hartohen ofertat;
 - h) kohën dhe vendin e hapjes publike të ofertave;
 - i) Kriteret që do të zbatohen në dhënien e koncesionit kur nuk figurojnë në dokumentet e tjera të koncesionit;
 - j) Data e shpërndarjes së njoftimit të koncesionit;
 - k) Emri dhe adresa e organit përgjegjës për shqyrtimin e ankesave. Informacion i saktë në lidhje me afatin për paraqitjen e ankesave ose, nëse është e nevojshme, emrin, adresën, numrin e telefonit, numrin e faksit dhe adresën e postës elektronike të shërbimit nga i cili mund të merret ky informacion;

- l) kur është e përshtatshme, kushtet e veçanta objekt i performancës së koncesionit;
 - ll) Kur është e përshtatshme, tregues të kërkesave dhe kushteve në lidhje me përdorimin e mjeteve të komunikimit elektronik;
 - m) kriteret e përjashtimit të ofertuesve;
 - n) llojin dhe vlerën e garancisë së ofertës që do të dorëzohet nga ofertuesit.
3. Njoftimi i kontratës botohet në një formular standard.
 4. Përmbajtja e formularit standard përcaktohet me vendim të Këshillit të Ministrave dhe është pjesë e dokumenteve standarde të tenderit.
 5. Njoftimi i kontratës publikohet në formë elektronike në platformën elektronike të prokurimit dhe në Buletinin e Prokurimit Publik.

Neni 34

Ftesa për ofertë

1. Në procedurat me faza, autoriteti ose enti kontraktues fton nëpërmjet një komunikimi me mjete elektronike ose me shkrim njëherësh të gjithë kandidatët e përzgjedhur për të vazhduar në fazën e dytë, për të dorëzuar ofertat ose për të negociuar. Ftesa përmban të gjithë informacionin e nevojshëm, në mënyrë që t'u mundësojë kandidatëve të përzgjedhur të dorëzojnë ofertat e tyre.
2. Përmbajtja e ftesës për ofertë përcaktohet me vendim të Këshillit të Ministrave.

Neni 35

Kërkesat teknike dhe funksionale

1. Kërkesat teknike dhe funksionale përcaktojnë karakteristikat e kërkuara të punëve ose shërbimeve që janë objekt i koncesionit dhe përcaktohen në dokumentet e tenderit.
2. Këto karakteristika mund t'i referohen edhe procesit specifik të krijimit ose ofrimit të punëve ose shërbimeve të kërkuara, me kusht që ato të jenë të lidhura me objektin e kontratës dhe në përpjestim me vlerën dhe objektivat e saj. Karakteristikat mund të përfshijnë, për shembull, nivelet e cilësisë, nivelet e performancës mjedisore dhe klimatike, projektin për të gjitha kërkesat (përfshirë aksesin për personat me aftësi të kufizuara) dhe vlerësimin e konformitetit, performancën, sigurinë ose dimensionet, terminologjinë, simbolet, metodat e testimit dhe testimin, shënimin dhe etiketimin, ose udhëzimet e përdoruesit.
3. Me përjashtim të rasteve kur justifikohet nga objekti i kontratës, kërkesat teknike dhe funksionale nuk i referohen një marke ose burimi të veçantë, ose një procesi të veçantë që karakterizon produktet ose shërbimet e ofruara nga një operator ekonomik specifik, ose markave tregtare, patentave, llojeve ose një prodhim specifik që ka si efekt favorizimin ose eliminimin e sipërmarrjeve të caktuara ose produkteve të caktuara. Një referencë e tillë lejohet, në raste të jashtëzakonshme, kur nuk është i mundur një përshkrim mjaft i saktë dhe i kuptueshëm i objektit të kontratës. Në çdo rast, një referencë e tillë shoqërohet me fjalët "ose ekuivalent".
4. Autoriteti ose enti kontraktues nuk refuzon një ofertë me arsyetimin se punët dhe shërbimet e ofertuara nuk janë në përputhje me kërkesat teknike dhe funksionale, të përcaktuara në dokumentet e tenderit, në rastet kur ofertuesi arrin të provojë me çdo mjet të përshtatshëm, që zgjidhjet që ai ka propozuar në ofertën e tij, plotësojnë në mënyrë ekuivalente kërkesat teknike dhe funksionale.

Neni 36

Garancitë procedurale

1. Kontratat e koncesionit/partneritetit publik privat jepen në bazë të kriterëve të vlerësimit të përcaktuara nga autoriteti kontraktues ose enti kontraktues në përputhje me nenin 40, me kusht që të plotësohen të gjitha kushtet e mëposhtme:

- a) oferta është në përputhje me kërkesat teknike minimale të përcaktuara, sipas rastit, nga autoriteti kontraktues ose enti kontraktues;
 - b) ofertuesi plotëson kushtet për pjesëmarrje të përmendura në pikën 1 të nenit 37; dhe
 - c) ofertuesi nuk ndodhet në kushtet e përjashtimit nga pjesëmarrja në procedurën e dhënies së koncesionit sipas pikës 4, 5, 6, 8, 9 dhe 10 të nenit 37, të këtij ligji.
2. Kërkesat minimale teknike të përmendura në shkronjën “a”, të pikës 1, të këtij neni, përmbajnë kushtet dhe karakteristikat (veçanërisht teknike, fizike, funksionale dhe ligjore) që çdo ofertë duhet të plotësojë ose të zotërojë.
3. Autoriteti kontraktues ~~kontraktues~~ ose enti kontraktues duhet të sigurojë:
- a) një përshkrim të objektit të koncesionit dhe të kushteve të pjesëmarrjes në njoftimin e kontratës së koncesionit;
 - b) një përshkrim të kriterëve të vlerësimit dhe, sipas rastit, të kërkesave minimale që duhen plotësuar në njoftimin e kontratës së koncesionit, në ftesën për ofertë ose në dokumentet e tenderit.
4. Autoriteti ose enti kontraktues mund të kufizojë numrin e kandidatëve ose ofertuesve në një nivel të përshtatshëm, me kusht që kjo të bëhet në mënyrë transparente dhe në bazë të kriterëve objektive. Numri i kandidatëve ose ofertuesve të ftuar duhet të jetë i mjaftueshëm për të siguruar konkurrencë të vërtetë.
5. Autoriteti ose enti kontraktues siguron që në dokumentet e tenderit pasqyrohet informacioni i nevojshëm për operatorët ekonomikë të interesuar lidhur me zhvillimin e procedurës konkurruese, si dhe një afat orientues i përfundimit të saj. Çdo modifikim i dokumenteve të tenderit u komunikohet të gjithë operatorëve ekonomikë në masën që ka të bëjë me elementët e shpallur në njoftimin e kontratës së koncesionit dhe në dokumentet e tenderit.
- Modifikimi i dokumenteve të tenderit kryhet nëpërmjet hartimit të një shtojcë, e cila komunikohet në të njëjtën mënyrë që është bërë publikimi i njoftimit të procedurës.
6. Autoriteti ose enti kontraktues siguron dokumentimin e duhur të fazave të procedurës duke përdorur mjetet që ai gjykon të përshtatshme.
7. Autoriteti ose enti kontraktues mund të zhvillojë negociata me kandidatët dhe ofertuesit. Objekti i koncesionit, kriteret e vlerësimit dhe kërkesat minimale teknike nuk ndryshohen gjatë zhvillimit të negociatave.

Neni 37

Përzgjedhja dhe vlerësimi i kandidatëve

1. Autoritetet dhe entet kontraktuese verifikojnë kushtet e pjesëmarrjes në lidhje me aftësinë teknike dhe profesionale, si dhe gjendjen ekonomike dhe financiare të kandidatëve ose ofertuesve. Verifikimi kryhet mbi bazën e vetëdeklarimeve dhe/ose të dokumenteve që paraqiten si provë, në përputhje me kriteret e kualifikimit të përcaktuara në njoftimin e kontratës së koncesionit dhe në dokumentet e tenderit. Kushtet për pjesëmarrje duhet të jenë jodiskriminuese, si dhe në përpjesëtim dhe të lidhura ngushtë me aftësinë zbatuese, natyrën dhe vlerën e kontratës, me qëllim sigurimin e konkurrencës.
2. Operatori ekonomik, me qëllim plotësimin e kushteve për pjesëmarrje të përcaktuara në pikën 1 të këtij neni, mund të mbështetet në kapacitetet e subjekteve të tjera, kur është e përshtatshme dhe për një kontratë të caktuar, pavarësisht natyrës juridike të lidhjeve që ai ka me ta. Kur një operator ekonomik dëshiron të mbështetet në kapacitetet e subjekteve të tjera, ai duhet t'i provojë autoritetit ose entit kontraktues se do të ketë në dispozicion, gjatë periudhës së kohëzgjatjes së kontratës, burimet e nevojshme, duke dorëzuar një angazhim me shkrim të këtyre subjekteve për këtë qëllim.

Për sa i përket gjendjes financiare, autoriteti ose enti kontraktues mund të kërkojë që operatori ekonomik dhe këto subjekte të jenë bashkërisht përgjegjës për zbatimin e kontratës.

3. Në të njëjtat kushte, grupi i operatorëve ekonomikë të përmendur në nenin 29 mund të mbështetet në kapacitetet e pjesëmarrësve në grup ose të subjekteve të tjera.
4. Çdo operator ekonomik që është ose ka qenë i dënuar me vendim gjyqësor të formës së prerë për ndonjë nga veprat penale të përmendura në këtë pikë, skualifikohet nga procedurat për dhënien e koncesioneve/partneriteteve publike për një periudhë 5-vjeçare nga data e ekzekutimit të dënimit, nëse nuk është përcaktuar një periudhë tjetër nga gjykata. Ky skualifikim bëhet për veprat penale të mëposhtme:
 - a) pjesëmarrje në grup të strukturuar kriminal, organizatë kriminale, bandë e armatosur, organizatë terroriste, sipas përcaktimeve të legjislacionit në fuqi;
 - b) korrupsion sipas përcaktimeve të legjislacionit në fuqi;
 - c) mashtrim sipas përcaktimeve të legjislacionit në fuqi;
 - ç) pastrim parash ose financim të terrorizmit sipas përcaktimeve të legjislacionit në fuqi;
 - d) vepra me qëllime terroriste ose vepra penale të lidhura me veprimtari terroriste, sipas përcaktimeve të legjislacionit në fuqi;
 - dh) puna e fëmijëve dhe forma të tjera të trafikimit të qenieve njerëzore sipas përcaktimeve të legjislacionit në fuqi.
5. Detyrimi për të përjashtuar një operator ekonomik zbatohet edhe kur personi i dënuar me vendim të formës së prerë është anëtar i organit administrativ, drejtues ose mbikëqyrës të atij operatori ekonomik ose ka kompetenca përfaqësimi, vendimmarrjeje ose kontrolluese brenda tij.
6. Një operator ekonomik skualifikohet nga pjesëmarrja në një procedurë konkurruese të dhënies me koncesion/partneritet publik privat, kur ka shkelur detyrimet e tij në lidhje me pagesën e taksave ose kontributeve të sigurimeve shoqërore, me përjashtim të rasteve, kur:
 - a) operatori ekonomik është në proces gjyqësor dhe nuk ka një vendim gjyqësor ose administrativ të formës së prerë, sipas legjislacionit në fuqi;
 - b) operatori ekonomik i ka përmbushur detyrimet e tij, duke paguar ose duke lidhur një marrëveshje detyruese me qëllim pagimin e detyrimeve tatimore që duhet të paguajë, duke përfshirë, aty ku është e zbatueshme, çdo kamatëvonesë ose gjobë. Në çdo rast, marrëveshja detyruese me qëllim pagimin e detyrimeve tatimore duhet të jetë e nënshkruar përpara datës së shpalljes së procedurës;
 - c) operatori ekonomik nuk ka paguar shuma të vogla tatimesh ose kontributesh të sigurimeve shoqërore deri në vlerën prej 100 000 lekësh;
 - ç) operatori ekonomik është informuar për shumën e saktë që duhet të paguajë pas shkeljes së detyrimit të tij për të paguar taksat ose kontributet e sigurimeve shoqërore, në një kohë të tillë kur nuk ka pasur mundësi të marrë masat e nevojshme për shlyerjen e tyre, përpara përfundimit të afatit për dorëzimin e kërkesës për pjesëmarrje/ofertës.
7. Autoritetet dhe entet kontaktuese mund të vendosin të mos e skualifikojnë operatorin ekonomik, pavarësisht parashikimeve të pikës 4, 5 dhe 6 të këtij neni, për arsye thelbësore që lidhen me interesin publik, si shëndeti publik ose mbrojtja e mjedisit.
8. Autoritetet dhe entet kontaktuese mund të përjashtojnë nga pjesëmarrja në një procedurë të dhënies me koncesion çdo operator ekonomik nëse plotësohet një nga kushtet e mëposhtme:
 - a) kur mund të demonstrojë me çdo mjet të përshtatshëm çdo shkelje të detyrimeve të zbatueshme të përmendura në pikës 4, të nenit 30, të këtij ligji;
 - b) kur operatori ekonomik ka falimentuar ose është subjekt i procedurave të falimentimit ose mbylljes, kur asetet e tij administrohen nga një administrator falimentimi ose nga gjykata, kur është në marrëveshje me kreditorët, kur aktivitetet e tij të biznesit janë pezulluar ose është në çdo situatë analoge që rrjedh nga një procedurë e ngjashme në zbatim të legjislacionit në fuqi.

Autoriteti ose enti kontraktues mund të vendosë të mos përjashtojë një operator ekonomik, i cili është në një nga situatat e mësipërme kur krijon bindjen se operatori ekonomik në fjalë do të jetë në gjendje të realizojë kontratën, duke marrë parasysh legjislacionin në fuqi dhe masat për vazhdimin e aktivitetit në rastin e këtyre situatave;

- c) kur autoriteti kontraktues mund të demonstrojë me çdo mjet të përshtatshëm se operatori ekonomik është shpallur fajtor për një shkelje të rëndë profesionale, gjë e cila e vë në dyshim integritetin e tij;
 - ç) operatori ekonomik ndodhet në kushtet e konfliktit të interesit, sipas parashikimeve të legjislacionit në fuqi, që nuk mund të korrigjohet në mënyrë të efektshme me ndonjë masë tjetër;
 - d) autoriteti ose enti kontraktues provon se operatori ekonomik ka lidhur marrëveshje me operatorë ekonomikë të tjerë që kanë si qëllim të shtrembërojnë konkurrencën;
 - dh) kur operatori ekonomik ka shfaqur mangësi të konsiderueshme ose të vazhdueshme në përmbushjen e një kushti thelbësor në një kontratë të mëparshme publike me një autoritet ose ent kontraktues siç përcaktohet në këtë ligj ose në ligjin e prokurimit publik, që ka çuar në përfundimin e parakohshëm të asaj kontrate të mëparshme, dëmshpërblime ose penalitete të tjera të ngjashme;
 - e) operatori ekonomik ka paraqitur deklaratat të rreme në dhënien e informacionit të kërkuar për të vërtetuar mungesën e arsyeve për skualifikim ose për plotësimin e kriterëve të përzgjedhjes, ka fshehur një informacion të tillë ose nuk është në gjendje të dorëzojë dokumentet provuese sipas kërkesave të përcaktuara në dokumentet e tenderit;
 - ë) kur operatori ekonomik ka marrë përsipër të ndikojë në mënyrë të padrejtë në procesin e vendimmarrjes së autoritetit ose entit kontraktues, për të marrë informacion konfidencial që mund t'i japë atij avantazhe të padrejta në procedurën e dhënies së koncesionit ose të japë nga pakujdesia informacione të gabuara që mund të kenë një ndikim domethënës në vendimet në lidhje me përjashtimin, përzgjedhjen ose dhënien e kontratës së koncesionit;
 - f) operatori ekonomik nuk ka regjistruar pronarët përfitues në regjistrin e pronarëve përfitues, sipas parashikimeve të legjislacionit në fuqi.
9. Autoritetet dhe entet kontaktuese përjashtojnë një operator ekonomik në çdo kohë gjatë zhvillimit të procedurës kur rezulton se operatori ekonomik në fjalë, për shkak të veprimeve të kryera ose të mosveprimeve përpara ose gjatë zhvillimit të procedurës, ndodhet në një nga situatat e parashikuara në pikën 4 dhe 6 të këtij neni.
10. Autoritetet dhe entet kontaktuese përjashtojnë një operator ekonomik në çdo kohë gjatë zhvillimit të procedurës kur rezulton se operatori ekonomik në fjalë, për shkak të veprimeve të kryera ose të mosveprimeve përpara ose gjatë zhvillimit të procedurës, ndodhet në një nga situatat e parashikuara në pikën 8 të këtij neni.
11. Operatori ekonomik që ndodhet në një nga kushtet e skualifikimit të parashikuara në pikë 4 dhe 8 të këtij neni mund të paraqesë prova për të vërtetuar se masat e marra prej tij janë të mjaftueshme për të treguar besueshmërinë e tij, pavarësisht ekzistencës së kushteve për skualifikim. Për këtë qëllim, operatori ekonomik duhet të provojë që ka paguar apo ka marrë angazhim të paguajë kompensim për çdo dëm të shkaktuar si pasojë e kryerjes së një veprë penale apo shkeljeje ligjore, që ka sqaruar faktet dhe rrethanat në mënyrë gjithëpërfshirëse duke bashkëpunuar me autoritetet hetimore dhe që ka marrë masa konkrete organizative dhe për personelin të përshtatshme për parandalimin e veprave penale apo shkeljeve të tjera. Masat e marra nga operatori ekonomik duhet të vlerësohen duke marrë parasysh rëndësinë dhe rrethanat e posaçme të veprës penale apo të shkeljes. Nëse masat e marra konsiderohen të pamjaftueshme, operatorit ekonomik i jepen arsyet për një vendim të tillë.
12. Operatori ekonomik, i përjashtuar me vendim përfundimtar nga e drejta për të fituar kontratat e prokurimit publik, koncesionit/partneritetit publik privat dhe ankandit publik nuk ka të drejtë të

përdorë mundësinë e parashikuar në pikën 11 të këtij neni, gjatë periudhës së përcaktuar të përjashtimit.

Neni 38

Afatet kohore për paraqitjen e ofertave dhe kërkesave për pjesëmarrje

1. Gjatë përcaktimit të afateve kohore për pranimin e ofertave ose kërkesave për pjesëmarrje, autoritetet ose entet kontraktuese marrin parasysh në veçanti kompleksitetin e kontratës dhe kohën e nevojshme për hartimin e tyre, pa cenuar afatet minimale kohore të përcaktuara në këtë nen.
2. Kur kërkesat për pjesëmarrje ose ofertat mund të bëhen vetëm pas një vizite në kantier ose pas shqyrtimit në vend të dokumenteve që mbështesin dokumentet e tenderit, afatet kohore vendosen në mënyrë të tillë që të gjithë operatorët ekonomikë të interesuar të mund të kenë marrë dijeni për të gjithë informacionin e nevojshëm për të përgatitur kërkesat për pjesëmarrje ose ofertat dhe, në çdo rast, afatet janë më të gjata se afatet minimale kohore të përcaktuara në pikën 3 dhe 4 të këtij neni.
3. Afati minimal kohor për pranimin e kërkesave për pjesëmarrje, pavarësisht nëse përfshin ose jo dorëzimin e ofertës, është 30 ditë nga data në të cilën është shpallur njoftimi i kontratës së koncesionit ose ftesa për shprehje interesi.
4. Kur procedura zhvillohet në faza të njëpasnjëshme, afati minimal kohor për pranimin e ofertave fillestare është 22 ditë nga data në të cilën është dërguar ftesa për ofertë.
5. Afati kohor për pranimin e ofertave mund të reduktohet me pesë ditë kur autoriteti ose enti kontraktues pranon që ofertat mund të dorëzohen me mjete elektronike.

Neni 39

Dhënia e informacionit për kandidatët dhe ofertuesit

1. Autoriteti ose enti kontraktues informon sa më shpejt që të jetë e mundur dhe në çdo rast brenda 10 ditëve nga marrja e një kërke me shkrim, çdo kandidat dhe ofertues për vendimet e marra në lidhje me dhënien e një kontrate koncesioni, duke përfshirë emrin e ofertuesit të suksesshëm, arsyet për çdo vendim të refuzimit të kërkesës ose ofertës së tij dhe arsyet për çdo vendim për të mos dhënë një kontratë, për të cilën ka pasur shpallje të njoftimit të kontratës së koncesionit.
2. Autoriteti ose enti kontraktues informon, me kërkesë të palës së interesuar, sa më shpejt të jetë e mundur dhe në çdo rast brenda 15 ditëve nga marrja e një kërke me shkrim çdo ofertues që ka paraqitur një ofertë të vlefshme në raport me karakteristikat dhe avantazhet e lidhura me ofertën fituese.
3. Pa cenuar detyrimet që rrjedhin nga ky nen, autoritetet kontraktuese ose entet kontraktuese mund të mos bëjnë publike disa nga informacionet e parashikuara në pikat 1 e 2 të këtij neni, nëse një gjë e tillë vjen në kundërshtim me legjislacionin për mbrojtjen e të dhënave ose cenon interesin publik apo interesat ligjore dhe ekonomike të palëve, ose pengon konkurrencën e drejtë. Nëse disa pjesë të ofertës së operatorëve ekonomikë deklarohen si konfidenciale, atëherë këto dokumente nuk do të vihen në dispozicion të kërkuësve.

Neni 40

Kriteret e vlerësimit për dhënien e kontratës së koncesionit

1. Kriter vlerësimi për dhënien e kontratës së koncesionit është oferta ekonomikisht më e favorshme, bazuar në kriteret të ndryshme, të lidhura me objektin e koncesionit në fjalë, që përfshijnë cilësinë, meritat teknike, karakteristikat estetike, funksionale e të mjedisit, kostot e drejtimit, kosto të efektivitetit, ofrimin e shërbimeve pas dorëzimit të produkteve dhe asistencën teknike, datën e

dorëzimit dhe periudhën e dërgesës ose periudhën e përfundimit të punimeve, çmimin e shërbimit për përfituesit fundorë, shumën e tarifës së koncesionit.

2. Komisioni i dhënies së koncesionit specifikon në dokumentet e tenderit dhe/ose në njoftimin e kontratës koeficientët relativë, që ai i jep secilit prej kriterëve të zgjedhura për të përcaktuar ofertën ekonomikisht më të favorshme. Këta koeficientë mund të shprehen duke parashikuar një gamë me një shtrirje të përshtatshme maksimale. Kur kjo nuk është e mundur, për shkak të arsyeve të justifikuara, autoriteti kontraktues tregon në njoftimin e kontratës kriteret, sipas rendit zbritës të rëndësisë.

4. Nëse ndonjë akt tjetër ligjor që rregullon koncesionet përcakton tarifën më të ulët të koncesionit, të cilën koncesionari është i detyruar ta paguajë, atëherë autoriteti kontraktues e deklaron këtë shumë në dokumentet e tenderit, si shuma të cilën ofertuesit duhet ta përfshijnë në ofertat e tyre.

5. Kriteret për dhënien e kontratës nuk duhet të jenë diskriminuese dhe duhet të jenë në përpjesëtim me objektin e koncesionit.

6. Në rast se autoriteti kontraktues ose enti kontraktues merr një ofertë që propozon një zgjidhje inovative të karakterizuar nga një nivel i jashtëzakonshëm i efikasitetit funksional, të cilën nuk mund ta parashikonte, përjashtimisht autoriteti kontraktues ose enti kontraktues mund të modifikojë renditjen e kriterëve për zgjedhjen e ofertës më të favorshme në mënyrë që të merret parasysh zgjidhja inovative e propozuar.

7. Në rastin e modifikimeve të përmendura në pikën 6 të këtij neni, autoriteti kontraktues ose enti kontraktues do të informojë të gjithë ofertuesit për modifikimin në fjalë sipas rendit të rëndësisë së kriterëve për zgjedhjen e ofertës më të favorshme dhe do të anulojë me vendim procedurën e dhënies së koncesionit dhe të publikojë një njoftim të ri për koncesion në përputhje me afatet minimale kohore të përmendura në nenin 38 të këtij ligji.

Neni 41

Dorëzimi i ofertave/kërkesave për pjesëmarrje

1. Ofertat/kërkesat për pjesëmarrje duhet të dorëzohen në adresën e përcaktuar në dokumentet e tenderit brenda afatit kohor, të përcaktuar në këto dokumente si afati i fundit për dorëzimin e tyre.

2. Në rastin e procedurave që zhvillohen në formë shkresore, çdo ofertë/kërkesë për pjesëmarrje e dorëzuar pas afatit të përcaktuar në njoftimin e autoritetit kontraktues ose entit kontraktues nuk shqyrtohet nga komisioni i dhënies së koncesionit dhe i kthehet e pahapur ofertuesit.

Operatorët ekonomikë mund të jenë të pranishëm, nëse e kërkojnë, në procesin e hapjes së ofertave/kërkesave për pjesëmarrje.

3. Në ofertën/kërkesën për pjesëmarrje të përgatitur, ofertuesit dorëzojnë të gjithë dokumentacionin e kërkuar. Kur procedura zhvillohet në formë shkresore, ky dokumentacion duhet të paraqitet në një zarf të mbyllur, me vulën e shoqërisë.

4. Në rastin e zhvillimit të procedurës konkurruese me mjete elektronike, dorëzimi i ofertave/kërkesave për pjesëmarrje nga ofertuesit/kandidatët kryhet në mënyrën e përcaktuar me vendim të Këshillit të Ministrave.

Neni 42

Hapja e ofertave /kërkesave për pjesëmarrje

1. Autoriteti kontraktues ose enti kontraktues i hap të gjitha ofertat/kërkesat për pjesëmarrje në datën, vendin dhe kohën e përcaktuar në dokumentet e tenderit, pas mbarimit të afatit përfundimtar për paraqitjen e ofertave ose pas mbarimit të afatit përfundimtar të përcaktuar pas zgjatjes së këtij afati, në përputhje me procedurat e specifikuara në dokumentet e tenderit.

2. Në rast se për arsye objektive, të shkaktuara nga një situatë e paparashikuar nga autoriteti kontraktues ose enti kontraktues në kohën e fillimit të procedurës, është e pamundur të respektohet afati i hapjes së ofertave/kërkesave për pjesëmarrje nga ana e autoritetit kontraktues ose entit kontraktues, duhet të dokumentohet arsyeja dhe të përcaktohet një datë e re për hapjen e tyre.
3. Ofertuesit/kandidatët ose përfaqësuesit e tyre të autorizuar, që kanë paraqitur oferta/kërkesa për pjesëmarrje, ftohen të marrin pjesë në hapjen e tyre, në rast se janë të interesuar. Mosparaqitja e tyre nuk pengon hapjen e ofertave/ kërkesave për pjesëmarrje.
4. Në momentin e hapjes së ofertave/ kërkesave për pjesëmarrje, anëtarët e komisionit të dhënies së koncesionit nënshkruajnë një deklaratë, përmes së cilës deklarojnë se nuk ndodhen në kushtet e konfliktit të interesit me ofertuesit/kandidatët pjesëmarrës.
- Nëse evidentohet se një ose disa prej operatorëve ekonomikë ndodhen në kushtet e konfliktit të interesit me një ose disa prej anëtarëve të komisionit të dhënies së koncesionit, atëherë duhet të zëvendësohet anëtari/anëtarët në fjalë dhe më pas të vazhdojë procedura e dhënies së kontratës.
5. Në rastin e prokurimit me mjete elektronike, hapja e ofertave/ kërkesave për pjesëmarrje bëhet si më poshtë:
 - a) autoriteti kontraktues ose enti kontraktues i hap të gjitha ofertat/kërkesat për pjesëmarrje në datën, vendin dhe kohën e përcaktuar në dokumentet e tenderit, pas mbarimit të afatit përfundimtar për paraqitjen e ofertave/kërkesave për pjesëmarrje ose pas mbarimit të afatit përfundimtar, të përcaktuar pas zgjatjes së këtij afati, në përputhje me procedurat e specifikuara në dokumentet e tenderit.
 - b) dokumentacioni i paraqitur nga ofertuesit/kandidatët regjistrohet automatikisht në sistem dhe procesi i hapjes nuk ka nevojë të dokumentohet në rrugë shkresore.
6. Në rastet kur procedura zhvillohet në formë shkresore, autoriteti kontraktues ose enti kontraktues dokumenton procesin nëpërmjet mbajtjes së një procesverbal, i cili duhet të pasqyrojë emrin, adresën e ofertuesit/kandidatit, dokumentacionin ligjor dhe çdo dokument të kërkuar nga autoriteti kontraktues ose enti kontraktues, si dhe çmimin e çdo oferte, të cilat lexohen me zë të lartë për ata persona që janë të pranishëm dhe regjistrohet në këtë procesverbal.

Procesverbal dhe një vërtetim, që pasqyron të gjitha dokumentet, që shoqërojnë ofertën/kërkesën për pjesëmarrje duhet t'i vihet në dispozicion në bazë të kërkesës çdo ofertuesi/kandidati, ndërsa ofertuesve/kandidatëve që nuk janë të pranishëm ose të përfaqësuar në hapjen e ofertave/ kërkesave për pjesëmarrje, duhet t'u dërgohet njoftim për zhvillimin e procedurës.

7. Dokumentet që shoqërojnë ofertën nuk u kthehen ofertuesve, por mbeten pjesë e dosjes së procedurës.

Neni 43

Shqyrtimi dhe vlerësimi i ofertave/kërkesave për pjesëmarrje

1. Kohëzgjatja e procedurës së vlerësimit nuk duhet të kalojë 30 (tridhjetë) ditë nga data e hapjes së ofertave/kërkesave për pjesëmarrje.
2. Autoriteti ose enti kontraktues, kur e shikon të arsyeshme, u kërkon ofertuesve/kandidatëve sqarime për ofertat e tyre, për shqyrtimin, vlerësimin dhe krahasimin sa më të drejtë të tyre. Pa cenuar dispozitat e parashikuara në këtë ligj, nuk duhet të kërkohej, të ofrohet ose të lejohet asnjë ndryshim në përmbajtjen e ofertës/kërkesës për pjesëmarrje, përfshirë ndryshimet në vlerë apo ndryshime që synojnë të kthejnë një ofertë /kërkesë për pjesëmarrje të pavlefshme në të vlefshme.
3. Autoriteti ose enti kontraktues, pavarësisht nga përcaktimi i pikës 2 të këtij neni, duhet të korrigjojë vetëm gabimet aritmetike, që zbulohen gjatë shqyrtimit të ofertave. Autoriteti ose enti kontraktues njofton menjëherë për këto korrigjime ofertuesin që ka paraqitur ofertën. Kur ofertuesi nuk pranon korrigjimin e një gabimi aritmetik, oferta e tij do të skualifikohet.

4. Autoriteti ose enti kontraktues, vlerëson një ofertë kërkesë për pjesëmarrje si të vlefshme vetëm nëse ajo është në përputhje me të gjitha kërkesat dhe specifikimet e përcaktuara në njoftimin e kontratës së koncesionit dhe në dokumentet e tenderit.

5. Oferta/ kërkesa për pjesëmarrje konsiderohet e vlefshme edhe nëse ajo përmban devijime të vogla, të cilat nuk ndryshojnë thelbësisht karakteristikat, kushtet dhe kërkesat e tjera, të përcaktuara në dokumentet e tenderit, gabime shtypi, të cilat mund të korrigjohen pa prekur përmbajtjen e saj, si edhe ato të lidhura me informacionet që merren lehtësisht nga dokumente faktike, që tregojnë gjendjen e operatorit ekonomik në kohën e dorëzimit të ofertës/ kërkesës për pjesëmarrje.

Neni 44

Njoftimi paraprak i fituesit

1. Pas përfundimit të procesit të vlerësimit të ofertave, autoriteti kontraktues ose enti kontraktues bën klasifikimin dhe harton njoftimin paraprak të fituesit.

2. Menjëherë, por jo më vonë se 5 (pesë) ditë pas përfundimit të procedurës së vlerësimit të ofertave, autoriteti kontraktues ose enti kontraktues publikon në sistemin e prokurimit elektronik njoftimin paraprak të fituesit. Me publikimin e njoftimit të fituesit në sistemin e prokurimit elektronik, operatorëve ekonomikë i lind e drejta e ankimit sipas parashikimeve të nenit 72 të këtij ligji.

3. Në rastin e procedurave konkurruese që zhvillohen në formë shkresore, autoriteti kontraktues ose enti kontraktues publikon njoftimin paraprak të fituesit në Buletinin e Njoftimeve Publike. Me publikimin e njoftimit paraprak të fituesit në Buletinin e Njoftimeve Publike, operatorëve ekonomikë iu lind e drejta e ankimit sipas parashikimeve të nenit 72 të këtij ligji.

Neni 45

Anulimi i procedurës

1. Autoriteti kontraktues ose enti kontraktues anulon procedurën konkurruese të dhënies me koncesion/partneritet publik privat në rastet kur:

- a) për shkak të rrethanave të paparashikueshme dhe objektive, nevojat ose aftësia paguese e autoritetit kontraktues ose entit kontraktues kanë ndryshuar;
- b) konstaton se dokumentet e tenderit përmbajnë gabime ose mangësi të rëndësishme;
- c) nuk është dorëzuar asnjë ofertë e përshtatshme;
- d) kur Komisioni i Prokurimit Publik vendos anulimin sipas parashikimeve në këtë ligj.

2. Kur procedura konkurruese anulohet në pajtim me shkronjën “a” të pikës 1 të këtij neni, autoriteti kontraktues ose enti kontraktues nuk duhet të shpallë një procedurë të re për të njëjtin objekt dhe me të njëjtat të dhëna.

3. Autoriteti kontraktues ose enti kontraktues nuk mban asnjë përgjegjësi ndaj ofertuesve/kandidatëve që kanë paraqitur oferta/kërkesa për pjesëmarrje për vendimin e marrë në bazë të pikës 1 të këtij neni.

4. Autoriteti kontraktues ose enti kontraktues u komunikon të gjithë kandidatëve ose ofertuesve vendimin dhe arsyet për të mos e vazhduar procedurën konkurruese të dhënies me koncesion menjëherë, por jo më vonë se 5 ditë nga marrja e vendimit. Me publikimin e këtij njoftimi, operatorëve ekonomikë iu lind e drejta e ankimit, sipas parashikimeve të nenit 72 të këtij ligji.

5. Autoriteti kontraktues ose enti kontraktues vijon me publikimin e vendimit përfundimtar për anulimin e procedurës së prokurimit jo më vonë se 5 (pesë) ditë nga data e skadimit të afatit të fundit për paraqitjen e ankesave ose dhënien e vendimit përfundimtar për ankimin, duke e publikuar njoftimin në të njëjtën mënyrë siç publikon njoftimin e kontratës.

Neni 46

Raporti përmbledhës për zhvillimin e procedurës konkurruese

1. Komisioni i dhënies së koncesionit, pas përfundimit të afateve të ankimit përgatit një raport përmbledhës për procesin e shqyrtimit e të vlerësimit të ofertave/kërkesave për pjesëmarrje dhe ia dërgon për miratim titullarit të autoritetit/entit kontraktues.
2. Raporti përmbledhës duhet të përmbajë:
 - a) emrin dhe adresën e autoritetit ose enti kontraktues, objektin dhe vlerën e përlogaritur të koncesionit;
 - b) përshkrimin e punëve/shërbimeve;
 - c) respektimin e kërkesave ligjore në procesin e hapjes së ofertave/ kërkesave për pjesëmarrje;
 - ç) çmimet/vlerën e ofertuesve pjesëmarrës;
 - d) korrigjimin e gabimeve aritmetike dhe ofertat anomalisht të ulëta (nëse ka pasur të tilla);
 - dh) rezultatet e përzgjedhjes së ofertuesve dhe/ose uljes së numrit të tyre, sipas parashikimeve në këtë ligj, përkatësisht:
 - i. të dhënat e ofertuesit fitues;
 - ii. emrat e ofertuesve të refuzuar dhe arsyet për refuzimin e tyre;
 - iii. të dhënat e ofertuesve të skualifikuar, ofertën ekonomike dhe arsyet e skualifikimit;
 - e) arsyet për refuzimin e ofertave anomalisht të ulëta;
 - ë) emrin e ofertuesit të suksesshëm dhe arsyet pse është zgjedhur oferta e tij dhe, kur dihet, përqindjen e kontratës që ofertuesi i suksesshëm planifikon të nënkontraktojë te palë të treta, emrat e nënkontraktorëve të kontraktorit kryesor, nëse ka;
 - f) sipas rastit, konfliktet e interesit që janë zbuluar dhe masat që janë marrë në vijim;
 - g) sipas rastit, ofertat të cilat janë vlerësuar me pikë të barabarta dhe hapat që janë ndjekur për procesin e hedhjes së shortit;
 - gj)informacion nëse ka pasur ankesa dhe vendimmarrjen në lidhje me to, si dhe çdo informacion tjetër a korrespondencë që lidhet me vlerësimin e ofertave/ kërkesave për pjesëmarrje.

Neni 47

Njoftimi i fituesit

1. Menjëherë, por jo më vonë se 5 (pesë) ditë pas miratimit të raport përmbledhës nga titullari i autoritetit ose entit kontraktues, komisioni i dhënies së koncesionit harton njoftimin e fituesit.
2. Njoftimin i fituesit, duhet të përmbajë të paktën, informacionin e mëposhtëm:
 - a) emrin, numrin unik të identifikimit, adresën duke përfshirë numrin e telefonit, faksit, e-mail-in dhe adresën e internetit të autoritetit kontraktues ose të entit kontraktues;
 - b) llojin e autoritetit kontraktues ose të entit kontraktues;
 - c) Kodet CPV;
 - d) Përshkrimi i koncesionit: natyra dhe shtrirja e punimeve, natyra dhe shtrirja e shërbimeve, kohëzgjatja e kontratës. Kur koncesioni ndahet në lote, ky informacion jepet për çdo lot. Kur është e përshtatshme, përshkrimi i çdo opsiioni;
 - e) Kriteret e përcaktuara në nenin 40, të cilat janë përdorur për dhënien e kontratës së koncesionit /partneritetit publik privat;
 - f) Datën e vendimit për dhënien e kontratës së koncesionit /partneritetit publik privat;
 - g) Numri i ofertave të paraqitura, të shoqëruar me vlerat përkatëse të ofertuara, duke përfshirë:
 - i. numrin e ofertave të marra nga operatorët ekonomikë të cilët janë ndërmarrje të vogla dhe të mesme;

- ii. numrin e ofertave të marra nga operatorë ekonomikë të huaj;
 - iii. numrin e ofertave të marra në mënyrë elektronike.
 - h) Emrin, adresën, numrin unik të identifikimit, adresën duke përfshirë numrin e telefonit, faksit, e-mail-in dhe adresën e internetit të ofertuesit të suksesshëm, duke përfshirë:
 - i. informacionin nëse ofertuesi i suksesshëm është ndërmarrje e vogël apo e mesme;
 - ii. informacionin nëse ofertuesi i suksesshëm është bashkim i përkohshëm operatorësh ekonomikë;
 - i) Vlera dhe kushtet kryesore financiare të koncesionit të dhënë, duke përfshirë:
 - i. çmimet e tarifave dhe gjokat nëse ka;
 - ii. çmimet dhe pagesat nëse ka.
 - j) Data e shpërndarjes së këtij njoftimi;
 - k) Metoda e përdorur për përlogaritjen e vlerës së koncesionit, nëse nuk është specifikuar në dokumentet e tenderit sipas parashikimeve të nenit 20;
 - l) Çdo informacion tjetër i nevojshëm.
3. Njoftimi i fituesit publikohet në një formular standard.
4. Përmbajtja e formularit përcaktohet me vendim të Këshillit të Ministrave dhe është pjesë e dokumenteve standarde të tenderit.
5. Njoftimi i fituesit publikohet në mënyrë elektronike në platformën elektronike të prokurimit dhe në Buletinin e Prokurimit Publik.

Neni 48

Propozimet e pakërkuara

1. Autoriteti ose enti kontraktues autorizohet të shqyrtojë dhe të pranojë propozimet e pakërkuara vetëm për realizimin e punimeve dhe/ose shërbimeve në: porte, aeroporte, energjinë për ngrohje dhe shpërndarjen e gazit natyror, për prodhimin dhe shpërndarjen e energjisë elektrike, me përjashtim të prodhimit dhe shpërndarjes së energjisë elektrike nga burimet hidrike, në përputhje me procedurat e përcaktuara në këtë nen, me kusht që këto propozime të mos kenë të bëjnë me një projekt për të cilin procedurat e përzgjedhjes kanë nisur apo janë shpallur.
2. Nëse propozimi i pakërkuar konsiderohet i pranueshëm, pas vlerësimit paraprak, autoriteti ose enti kontraktues mund të ndërmarrë veprimet për dhënien e koncesionit/PPP. Nuk do të pranohen propozimet e pakërkuara, të shoqëruara me studim në formë minimale.
3. Kur procedura e dhënies së koncesionit/PPP e nisur mbi një propozim të pakërkuar finalizohet me nënshkrimin e kontratës, autoriteti ose enti kontraktues kompenson shpenzimet e bëra nga propozuesi për përgatitjen e studimit të fizibilitetit, vetëm nëse propozuesi i pakërkuar nuk është ofertuesi fitues.
4. Shuma e kompensimit për propozimin e pakërkuar nuk mund të jetë më e lartë se 1 % e vlerës së investimit. Vlera e përcaktuar e kompensimit do të publikohet në dokumentet e procedurës konkurruese dhe do të paguhet nga ofertuesi i shpallur fitues përpara nënshkrimit të kontratës.
5. Këshilli i Ministrave përcakton rregullat për vlerësimin e pranueshmërisë, përmbajtjen dhe trajtimin e propozimeve të pakërkuara dhe mënyrën e llogaritjes së shumës së kompensimit.

KREU IV

LLOJET E PROCEDURAVE PËR DHËNIEN E KONCESIONEVE

Neni 49

Procedurat standarde të dhënies së koncesionit

1. Autoriteti ose enti kontraktues për përcaktimin e fituesve të kontratave të koncesionit/partneritetit publik private zbaton procedurat e mëposhtme:

- a) procedurë e hapur;
 - b) procedurë e kufizuar;
 - c) procedurë konkurruese me negociim, e cila përdoret vetëm në rastin e kontratave të sektorit klasik;
 - ç) procedurë me negociim me shpallje paraprake të njoftimit, e cila përdoret vetëm në rastin e kontratave sektoriale.
2. Këshilli i Ministrave përcakton rregulla me të hollësishme për zhvillimin e procedurave konkurruese të parashikuara në pikën 1 të këtij neni.

Neni 50

Procedurë e hapur

1. Procedura e hapur është procedurë me një fazë, ku mund të marrë pjesë çdo operator ekonomik i interesuar.
 2. Në procedurën e hapur, autoriteti ose enti kontraktues shpall një njoftim, sipas përcaktimeve në nenin 33 të këtij ligji, i cili përmban një përshkrim të objektit të koncesionit. Njoftimi i kontratës së koncesionit publikohet në sistemin e prokurimit elektronik dhe në Buletinin e Njoftimeve Publike.
 3. Afati minimal për pranimin e ofertave është jo më pak se 35 ditë nga data në të cilën është shpallur njoftimi i kontratës. Autoriteti/enti kontraktues mund të përllogarisë afate më të gjata, kur një gjë e tillë diktohet nga kompleksiteti i objektit të koncesionit apo kërkesave që do duhet të plotësojnë operatorët ekonomikë.
 4. Afati për dorëzimin e ofertave, përcaktuar në pikën 3 të këtij neni, mund të shkurtohet me 5 ditë kur ofertat paraqiten me mjete elektronike.
- Në rast se dokumentet e tenderit nuk janë të disponueshme nëpërmjet mjeteve elektronike, afati për dorëzimin e ofertave, i përcaktuar në pikën 3 të këtij neni, zgjatet me 5 ditë.
5. Pas mbarimit të afatit për paraqitjen e ofertave, të përcaktuar në njoftimin e kontratës së koncesionit, autoriteti ose enti kontraktues hap ofertat, vlerëson dokumentacionin e ofertuesve, në bazë të kriterëve të kualifikimit përcaktuara në nenin 37 të këtij ligji dhe përzgjedh ofertën fituese, pas krahasimit të ofertave, bazuar në kriteret e vlerësimit të përcaktuara në nenin 40 të këtij ligji.

Neni 51

Procedurë e kufizuar

1. Procedura e kufizuar është procedurë me dy faza, në të cilën mund të marrë pjesë çdo operator ekonomik i interesuar.
- Njoftimi i kontratës publikohet në sistemin e prokurimit elektronik dhe në Buletinin e Njoftimeve Publike, në përputhje me këtë ligj. Në çdo rast, njoftimi i kontratës shoqërohet me ftesën për shprehje interesi për procedurën e dhënies së koncesionit. Çdo operator ekonomik i interesuar mund të dorëzojë një kërkesë për pjesëmarrje në fazën e parë të kualifikimit.
2. Afati kohor minimal për marrjen e kërkesave për pjesëmarrje është jo më pak se 30 ditë nga data në të cilën është shpallur njoftimi i kontratës ose ftesa për shprehje interesi. Autoriteti/enti kontraktues mund të përllogarisë afate më të gjata, kur një gjë e tillë diktohet nga kompleksiteti i objektit të koncesionit apo kërkesave që do duhet të plotësojnë operatorët ekonomikë.
 3. Në fazën e dytë të procedurës së kufizuar, ofertë mund të paraqesin vetëm kandidatët e përzgjedhur nga autoriteti ose enti kontraktues. Autoriteti ose enti kontraktues mund të kufizojë numrin e kandidatëve të përshtatshëm për t'u ftuar që të marrin pjesë në procedurë, në përputhje me parashikimet në këtë ligj. Nëse do të përdorë këtë mundësi, autoriteti/enti kontraktues duhet ta bëjë të ditur në njoftimin e kontratës, ku duhet të përcaktojë dhe numrin minimal të kandidatëve që synon të ftojë dhe, sipas rastit, numrin maksimal.
 4. Pas mbylljes së fazës së parë të kualifikimit dhe në përfundim të afateve të ankimit, sipas

parashikimit në nenin 72 të këtij ligji, autoriteti/enti kontraktues fton kandidatët e përzgjedhur të dorëzojnë ofertat.

Ofertat duhet të hartohen në bazë të specifikimeve teknike dhe kushteve të përcaktuara në ftesën për ofertë dhe në dokumentet e tenderit.

5. Në procedurën e kufizuar, afati minimal i përcaktuar nga autoriteti kontraktues për pranimin e ofertave është 30 ditë nga data në të cilën është dërguar ftesa për ofertë.

6. Autoriteti ose enti kontraktues mund të shkurtojë me 5 ditë afatin kohor për marrjen e ofertave/kërkesave për pjesëmarrje në rast se paraqiten me mjete elektronike.

Në rast se dokumentet e tenderit nuk janë të disponueshme nëpërmjet mjeteve elektronike, afati për dorëzimin e ofertave/kërkesave për pjesëmarrje zgjatet me 5 ditë.

7. Në përfundim të procesit të vlerësimit të dokumentacionit të ofertuesve, në bazë të kriterëve të kualifikimit të përcaktuara në nenin 37, të këtij ligji, autoriteti ose enti kontraktues përzgjedh ofertën fituese, pas krahasimit të ofertave, bazuar në kriteret e vlerësimit të përcaktuara në nenin 40, të këtij ligji.

Neni 52

Procedurë konkurruese me negociim

1. Procedura konkurruese me negociim është procedurë me faza, në të cilën mund të marrë pjesë çdo operator ekonomik i interesuar.

2. Njoftimi i kontratës hartohet dhe publikohet në sistemin e prokurimit elektronik dhe në Buletinin e Njoftimeve Publike, në përputhje me këtë ligj. Në çdo rast, njoftimi i kontratës shoqërohet me ftesën për shprehje interesi për procedurën e dhënies së koncesionit. Çdo operator i interesuar ekonomik mund të dorëzojë një kërkesë për pjesëmarrje në fazën e parë të kualifikimit.

3. Në dokumentet e tenderit, autoritetet kontraktuese identifikojnë objektin e prokurimit, duke bërë një përshkrim të nevojave të tyre dhe karakteristikave të kërkuara për punët ose shërbimet objekt i koncesionit, si dhe specifikojnë kriteret e përcaktimit të ofertës fituese.

Në çdo rast, autoriteti kontraktues duhet të përcaktojë në dokumentet e tenderit të gjitha kërkesat që ofertat duhet të plotësojnë.

Informacioni i dhënë duhet t'u mundësojë operatorëve ekonomikë të identifikojnë natyrën dhe objektin e koncesionit dhe të vendosin nëse do të paraqesin kërkesë për pjesëmarrje në procedurë.

4. Afati kohor minimal për pranimin e kërkesave për pjesëmarrje është 30 ditë nga data në të cilën është shpallur njoftimi i kontratës ose ftesa për shprehje interesi.

5. Vetëm operatorët ekonomikë që janë ftuar nga autoriteti kontraktues mund të paraqesin ofertë fillestare, e cila shërben si bazë për negociimet vijuese. Autoritetet kontraktuese mund të kufizojnë numrin e kandidatëve të përshtatshëm për t'u ftuar që të marrin pjesë në procedurë, në përputhje me parashikimet e këtij ligji. Nëse do të përdorë këtë mundësi, autoriteti kontraktues duhet ta bëjë të ditur në njoftimin e kontratës, ku duhet të përcaktojë dhe numrin minimal të kandidatëve që synon të ftojë dhe, sipas rastit, numrin maksimal.

6. Me përjashtim të rasteve kur parashikohet ndryshe në pikën 7 të këtij neni, autoritetet kontraktuese negociojnë me ofertuesit ofertat fillestare dhe të gjitha ofertat pasuese që ata kanë dorëzuar, me qëllim përmirësimin e tyre në përmbajtje, me përjashtim të ofertave përfundimtare. Kërkesat minimale dhe kriteret për shpalljen e kontratës fituese nuk janë objekt negociimi.

7. Autoritetet kontraktuese mund të japin kontrata mbi bazën e ofertave fillestare pa negociim, kur në njoftimin e kontratës ose në ftesën për të shprehur interesin është bërë e ditur se u rezervohet mundësia për ta bërë diçka të tillë.

8. Pas mbylljes së fazës së parë të kualifikimit dhe në përfundim të afateve të ankimit, sipas parashikimeve të nenit 72 të këtij ligji, autoriteti kontraktues fton kandidatët e përzgjedhur të dorëzojnë ofertat tekniko-ekonomiko. Vetëm operatorët ekonomikë që janë ftuar nga autoriteti kontraktues mund të paraqesin ofertë fillestare, e cila shërben si bazë për negociimet vijuese.

9. Afati kohor minimal për pranimin e ofertës fillestare për këtë procedurë, është 22 ditë nga data e dërgimit të ftesës për ofertë.

10. Autoritetet kontraktuese sigurojnë trajtim të barabartë për të gjithë ofertuesit gjatë negocimit dhe në asnjë rast nuk jep informacione në mënyrë diskriminuese, të cilat mund të favorizojnë disa prej pjesëmarrësve. Ata informojnë me shkrim të gjithë ofertuesit, ofertat e të cilëve kalojnë në fazën tjetër, për çdo ndryshim në specifikimet teknike ose në dokumente të tjera të tenderit, përveç atyre që përcaktojnë kërkesat minimale. Pas këtyre ndryshimeve autoritetet kontraktuese parashikojnë një afat jo më pak se 5 ditë, që ofertuesit të modifikojnë dhe të dorëzojnë përsëri ofertat e ndryshuara sipas rastit.

Autoritetet kontraktuese nuk u tregojnë pjesëmarrësve të tjerë informacionin konfidencial të komunikuar nga një kandidat ose një ofertues që merr pjesë në negocime, pa pëlqimin e këtij të fundit.

11. Procedurat konkurruese me negocim mund të zhvillohen në faza të njëpasnjëshme, për të ulur numrin e ofertave që do të negociohen. Autoriteti kontraktues bën me dije nëse do ta përdorë këtë mundësi në njoftimin e kontratës ose në ftesën për shprehje interesi.

12. Gjatë fazës së negociimit, autoriteti kontraktues, synon që ofertat të qartësohen, specifikohen dhe të përshtaten sipas kërkesës dhe nevojës së autoritetit kontraktues. Megjithatë, ky qartësim, specifikim, përshtatje ose informacion shtesë nuk duhet të përfshijë ndryshime në aspektet kryesore të ofertës, duke përfshirë nevojat dhe kërkesat e përcaktuara në njoftimin e kontratës, të cilat mund të shtrembërojnë konkurrencën ose të kenë efekt diskriminues.

Nevojat dhe kërkesat e përcaktuara në njoftimin e kontratës nuk mund të ndryshohen në këtë fazë, pasi do të përfitohej një kontratë e ndryshme nga ajo, për të cilën është realizuar procedura e koncesionit.

13. Autoriteti kontraktues mund të negociojë individualisht me secilin nga ofertuesit e përzgjedhur deri në përcaktimin e ofertës fituese. Nuk ka një limit për numrin e fazave të njëpasnjëshme të negociimit, me kusht që autoriteti ose enti kontraktues të ketë publikuar informacionin ose të njoftojë rregullisht të gjithë ofertuesit për çdo fazë të negociimit.

14. Kur autoriteti kontraktues synon të mbyllë negociatat, ai informon ofertuesit që kanë mbetur dhe cakton një afat të përbashkët për të dorëzuar çdo ofertë të re ose të rishikuar. Autoriteti kontraktues vlerëson ofertat përfundimtare dhe verifikon në rast se ato janë në përputhje me kërkesat minimale dhe me parimet e përgjithshme të përzgjedhjes dhe shpall fituesin sipas parashikimeve në këtë ligj.

15. Autoriteti kontraktues mund të shkurtojë me 5 ditë afatin kohor për marrjen e ofertave/kërkesave për pjesëmarrje në rast se paraqiten me mjete elektronike.

Në rast se dokumentet e tenderit nuk janë të disponueshme nëpërmjet mjeteve elektronike, afati për dorëzimin e ofertave/kërkesave për pjesëmarrje zgjatet me 5 ditë.

16. Në përfundim të procesit të vlerësimit të dokumentacionit të ofertuesve, në bazë të kriterëve të kualifikimit të përcaktuara në nenin 37, të këtij ligji, autoriteti kontraktues përzgjedh ofertën fituese, pas krahasimit të ofertave, bazuar në kriteret e vlerësimit të përcaktuara në nenin 40, të këtij ligji.

Neni 53

Rastet e përdorimit të procedurës konkurruese me negocim

Autoritetet kontraktuese mund të përdorin një procedurë konkurruese me negocim në rastet e mëposhtme:

1. Për kontratat e punëve ose shërbimeve që përmbushin një ose disa nga kriteret e mëposhtme:
 - a) kur për të përmbushur nevojat e autoritetit kontraktues është e nevojshme të përshtaten zgjidhjet ekzistuese, që autoritetet kontraktuese i kanë në dispozicion;
 - b) kur ato përfshijnë projektim ose zgjidhje inovatore;

c) kontrata nuk mund të jepet pa negocim paraprak për shkak të rrethanave specifike që lidhen me natyrën, kompleksitetin, kuadrin juridik dhe financiar ose për shkak të rreziqeve që shoqërojnë ato;
ç) specifikimet teknike nuk mund të përcaktohen me saktësinë e duhur nga autoriteti kontraktues bazuar në standarde të miratuara apo duke iu referuar specifikimeve të caktuara, në përputhje me parashikimet e këtij ligji.

Neni 54

Procedura me negocim, me shpallje paraprake të njoftimit

1. Për prokurimin e kontratave sektoriale entet kontraktuese mund të përdorin procedurën me negocim, me shpallje paraprake të njoftimit, në të cilën çdo operator ekonomik mund të dorëzojë një kërkesë për pjesëmarrje pas publikimit të njoftimi të kontratës dhe ftesës për shprehje interesi, duke dhënë informacionin për përzgjedhjen cilësore që kërkohet nga enti kontraktuese.
2. Procedura me negocim, me shpallje paraprake të njoftimit, përdoret në ato raste kur entet kontraktuese negociojnë me ofertuesit, me qëllim përshtatjen e ofertave të tyre me kërkesat e përcaktuara në njoftimin e kontratës, me specifikimet dhe dokumentet mbështetëse, nëse ka të tilla, për të përzgjedhur ofertën më të mirë.
3. Njoftimi i kontratës ose ftesa për shprehje interesi për procedurën me negocim me shpallje paraprake të njoftimit publikohen në sistemin e prokurimit elektronik dhe në Buletinin e Njoftimeve Publike.
4. Afati kohor minimal për marrjen e kërkesave për pjesëmarrje është jo më pak se 30 ditë nga data e publikimit të njoftimit të kontratës ose ftesës për shprehje interesi. Enti kontraktues mund të përllogarisë afate më të gjata, kur një gjë e tillë diktohet nga kompleksiteti i objektit të procedurës apo kërkesave që do duhet të plotësojnë operatorët ekonomikë.
5. Pas mbylljes së fazës së kualifikimit dhe në përfundim të afateve të ankimit, sipas parashikimeve të nenit 72 të këtij ligji, enti kontraktues fton kandidatët e përzgjedhur për të negociuar. Vetëm ata operatorë ekonomikë që ftohen nga enti kontraktues, pasi ky i fundit ka vlerësuar informacionin e kërkuar, mund të marrin pjesë në negociim.
6. Në negocim mund të marrin pjesë vetëm ata operatorë ekonomikë që ftohen nga enti kontraktues, pasi ky i fundit ka vlerësuar informacionin e paraqitur. Entet kontraktuese mund të kufizojnë numrin e kandidatëve që do të ftohen të marrin pjesë në procedurë, në përputhje këtë ligj. Nëse do të përdorë këtë mundësi, enti kontraktues duhet ta bëjë të ditur në njoftimin e kontratës, ku duhet të përcaktojë dhe numrin minimal të kandidatëve që synon të ftojë dhe, sipas rastit, numrin maksimal.
7. Afati kohor për marrjen e ofertave mund të përcaktohet me anë të një marrëveshjeje të përbashkët ndërmjet entit kontraktues dhe kandidatëve të përzgjedhur, me kusht që të gjithë atyre t'u jepet kohë e barabartë për të përgatitur dhe dorëzuar ofertat e tyre. Në mungesë të marrëveshjes për afatin kohor për pranimin e ofertave, afati kohor është jo më pak se 22 ditë nga data e dërgimit të ftesës për ofertë.
8. Negocimi mund të zhvillohet në disa faza, deri në përcaktimin e ofertës fituese. Enti kontraktues mund të kufizojë numrin e kandidatëve të ftuar në këtë fazë, vetëm nëse enti kontraktues e ka njoftuar këtë mundësi në njoftimin e kontratës ose në ftesën për ofertë. Enti kontraktues nëse nuk bie dakord me të gjithë pjesëmarrësit për afatin ndërmjet fazave, cakton një afat të arsyeshëm, por jo më të shkurtër se 22 ditë, dhe njofton pjesëmarrësit në kohë. Enti kontraktues siguron trajtim të barabartë për të gjithë pjesëmarrësit, dhe në asnjë rast nuk jep informacione në mënyrë diskriminuese, të cilat mund të favorizojnë një ose disa prej pjesëmarrësve. Enti kontraktues nuk u tregon pjesëmarrësve të tjerë, zgjidhjet e propozuara ose informacionin konfidencial që është komunikuar nga një kandidat ose një ofertues që merr pjesë në negociim, pa pëlqimin e këtij të fundit.

KREU V

KONTRATA E KONCESIONIT/PARTNERITETIT PUBLIK PRIVAT

Neni 55

Lidhja e kontratës

1. Autoriteti ose enti kontraktues nuk mund të lidhë kontratën para përfundimit të periudhës së pritjes së ankesave, të përcaktuar në nenin 72 të këtij ligji.
2. Autoriteti ose enti kontraktues fton ofertuesin më të suksesshëm për lidhjen e kontratës, pas botimit të njoftimit të fituesit, në platformën elektronike të prokurimit.
3. Pas negocimit të kontratës me operatorin e shpallur fitues dhe përpara nënshkrimit të saj, autoriteti ose enti kontraktues e dërgon projekt kontratën për vlerësim përfundimtar, në përputhje me kriteret e përcaktuara në pikën 2, të nenit 10, të ligjit, në ministrinë përgjegjëse për financat.
4. Kontrata hartohet me shkrim dhe nënshkruhet nga personi i autorizuar i autoritetit ose entit kontraktues dhe ofertuesi i zgjedhur si më i suksesshmi.
5. Kur ofertuesi i përzgjedhur si më i suksesshmi, në përputhje me dokumentet e tenderit, me vendimin për dhënien e kontratës fituese dhe me ofertën e zgjedhur, është i detyruar të krijojë një subjekt për qëllime të veçanta (SPV), të rregulluar sipas legjislacionit në fuqi, si një shoqëri me seli në Republikën e Shqipërisë me shënimin para emrit “Shoqëri koncesionare” dhe me objekt “Objektin e kontratës së koncesionit”, autoriteti ose enti kontraktues nënshkruan kontratën me personin e autorizuar të shoqërisë në fjalë.
6. Autoriteti ose enti kontraktues, me përfundimin e regjistrimit, sipas legjislacionit në fuqi, të shoqërisë koncesionare, dërgon një kopje të kontratës dhe ekstraktit të regjistrimit në Ministrinë e Financave.
7. Nëse ofertuesi i zgjedhur si më i suksesshmi tërhiqet nga lidhja e kontratës ose nuk dorëzon në kohën e përcaktuar garancitë dhe instrumentet e përshkruara në nenin 39 të këtij ligji, atëherë autoriteti ose enti kontraktues mund të marrë një vendim të ri për dhënien e kontratës dhe t’i ofrojë nënshkrimin e kontratës ofertuesit të radhës që është renditur si më i miri.
8. Kontratat e koncesionit/partneritetit publik privat me mbështetje financiare dhe që marrin përsipër risqe fiskale, pas nënshkrimit nga palët dhe vetëm pas marrjes së vlerësimit përfundimtar nga ministria përgjegjëse për financat, në përputhje me pikën 3 të këtij neni, dërgohen për miratim në Këshillin e Ministrave. Llojet dhe natyra e risqeve fiskale të mundshme përcaktohen me vendim të Këshillit të Ministrave.

Neni 56

Përmbajtja e kontratës

1. Kontrata përcakton të drejtat dhe detyrimet e autoritetit ose entit kontraktues dhe koncesionarit/partnerit privat, në përputhje me dispozitat e këtij ligji dhe legjislacionin në fuqi të Republikës së Shqipërisë.
2. Çështjet e kontratës, që nuk rregullohen me këtë ligj, janë subjekt i dispozitave të Kodit Civil.
3. Kontrata duhet të hartohet në përputhje me dokumentet e tenderit, studimin e fizibilitetit, me informacionet që gjenden në njoftimin e kontratës, me ofertën e zgjedhur dhe me njoftimin e fituesit.
4. Përveç kontratës, autoriteti kontraktues ose enti kontraktues ka të drejtën, në përputhje me këtë ligj, me dokumentet e tenderit, me vendimin e dhënies së koncesionit/partneritetit publik privat dhe me ofertën e zgjedhur, të lidhë marrëveshje dhe/ose kontrata shtesë dhe/ose të kushtëzuara,

rast në të cilin autoriteti ose enti kontraktues kërkon miratimin paraprakisht nga ministria përgjegjëse për financat.

5. Marrëveshje dhe/ose kontrata shtesë dhe/ose të kushtëzuara, të përshkruara në pikën 4 të këtij neni, quhen në veçanti ato, të cilat janë të lidhura për të siguruar financimin e nevojshëm për zbatimin e kontratës.
6. Kontrata e koncesionit/partneritetit publik privat rregullon, në përputhje me dokumentacionin e tenderit, me vendimin e dhënies së koncesionit dhe me ofertën e zgjedhur shpallur fituese, të gjitha çështjet që janë të lidhura me pronësinë e pasurive të paluajtshme dhe pasurive të tjera, që janë objekt i kontratës së koncesionit/partneritetit publik privat dhe pronësinë e pasurive të paluajtshme ose jo, që lindin në bazë të kontratës së koncesionit/partneritetit publik privat për kohëzgjatjen e saj apo pas përfundimit të saj.

Neni 57 **Garancitë e realizimit të kontratës**

1. Para nënshkrimit të kontratës, autoriteti kontraktues ose enti kontraktues merr nga ofertuesi më i suksesshëm garancitë e kërkuara për realizimin e kontratës dhe instrumentet e sigurisë si kompensim për dëmin që mund të shkaktohet si pasojë e dështimit të koncesionarëve/partnerëve privatë për të përmbushur detyrimet e parashikuara në kontratë (premtim për pagesë, garanci bankare, garanci të korporatës, kambiale etj.).
2. Sigurimi i kontratës koncesion i shërbimeve publike do të jetë deri në 5% të vlerës së kontratës. Kjo masë mund të reduktohet në mënyrë përpjesëtimore gjatë ekzekutimit të kontratës, por në asnjë rast gjatë kohëzgjatjes së saj nuk mund të jetë më e vogël se 25% e vlerës fillestare të sigurimit.
3. Sigurimi i kontratës koncesion i punëve publike do të jetë deri në 5% të vlerës së ndërtimit, ndërsa pas periudhës së ndërtimit do të jetë deri në 5% të vlerës së mbetur të kontratës.
4. Garancitë dhe instrumentet e sigurisë depozitohen pranë autoritetit ose entit kontraktues, i cili është i detyruar t'i ruajë ato gjatë të gjithë kohëzgjatjes së kontratës.
5. Autoriteti ose enti kontraktues verifikon rregullisht vlefshmërinë e instrumenteve të sigurisë.
6. Në bazë të pikës 3 të këtij neni dhe në rast se instrumenti i mbyllur i sigurisë nuk është i vlefshëm, autoriteti ose enti kontraktues i kërkon pa vonesë koncesionarit/partnerit privat të paraqesë një instrument të ri të sigurisë.

Neni 58 **Tarifa e koncesionit**

1. Nëse është përcaktuar në studimin e fizibilitetit, koncesionari/partneri privat paguan një kompensim monetar për koncesionin/partneritetin publik privat në shumën dhe në mënyrën e përcaktuar në kontratën e koncesionit/partneritetit publik privat. Përfshirja nga pagesa e kësaj tarife bëhet vetëm për rastet e koncesioneve/partneriteteve publike private që aplikohen në fushën e shëndetësisë dhe në fushën e sportit.
2. Tarifa koncesionare paguhet në përputhje me rregullat e caktuara nga ~~Ministri i Financave~~ ministri përgjegjës për financat për arkëtimin e të ardhurave për llogari të Buxhetit të Shtetit.
3. Shuma dhe afatet e pagesës së tarifës së koncesionit/partneritetit publik privat përcaktohen në përpjesëtim me objektin e koncesionit/partneritetit publik privat, me vlerën e parashikuar të kontratës, kohëzgjatjen e kontratës, risqet dhe kostot që koncesionari/partneri privat merr përsipër dhe fitimin e pritshëm, si dhe me nivelin e pajisjeve dhe vlerën e pronës së dhënë sipas kontratës nga autoriteti ose enti kontraktues.

4. Kontrata e koncesionit mund të përcaktojë ndryshueshmërinë e shumës dhe/ose mënyrën e llogaritjes dhe të pagesës së tarifës së koncesionit brenda një periudhe kohore të caktuar, gjatë të gjithë periudhës së kohëzgjatjes së kontratës së koncesionit, në përputhje me dokumentacionin e tenderit dhe me vendimin për dhënien e kontratës.
5. Tarifat e koncesionit janë pjesë e të ardhurave të Buxhetit të Shtetit të Republikës së Shqipërisë dhe/ose të buxheteve të organeve të qeverisjes vendore.
6. Kur tarifa koncesionare nuk paguhet në përputhje me përcaktimet e këtij neni, autoriteti ose enti kontraktues njofton ministrin përgjegjës për financat, urdhri i të cilit për arkëtimin e tarifës përbën titull ekzekutiv për bankat e nivelit të dytë ku ndodhet llogaria bankare e shoqërisë koncesionare që vihet në ekzekutim nga përmbaruesi gjyqësor.

Neni 59

Afati i kontratës së koncesionit/partneritetit publik privat

1. Kontrata e koncesionit/partneritetit publik privat lidhet për një periudhë të caktuar.
2. Autoriteti kontraktues përcakton në studimin e fizibilitetit të koncesionit/partneritetit publik privat afatin e kontratës, në mënyrë të tillë që kohëzgjatja e saj nuk e kufizon konkurrencën më shumë sesa është e nevojshme, në mënyrë që një koncesionar/partner privat të rikuperojë investimet e bëra në funksionimin e punëve ose shërbimeve së bashku me një kthim të kapitalit të investuar duke marrë parasysh investimet e nevojshme për të arritur objektivat specifike kontraktuale të ndërmarra nga koncesionari/partneri privat gjatë kohëzgjatjes së kontratës. Investimet e marra parasysh për qëllimet e llogaritjes përfshijnë si investimet fillestare ashtu edhe investimet gjatë jetës së koncesionit.
3. Kontrata e koncesionit/partneritetit publik privat nuk mund të lidhet për një periudhë më të shkurtër se 5 vjet dhe jo më të gjatë se 35 vjet.
4. Afati kohor, për të cilin është dhënë koncesioni/partneriteti publik privat, fillon nga data e hyrjes në fuqi të kontratës.
5. Afati kohor i kontratës mund të zgjatet, nëse është e nevojshme, për shkak të ndryshimeve të kontratës, siç parashikohet në nenet 60 dhe 61 të këtij ligji.

Neni 60

Ndryshimi i kontratës së koncesionit/partneritetit publik privat

1. Kontratat e parashikuara me këtë ligj mund të ndryshohen duke i shtuar kontratës një aneks, me kusht që kjo mundësi të parashikohet në dokumentet e tenderit dhe në kontratë.
2. Ndryshimet në kontratë bëhen nga autoriteti ose enti kontraktues dhe koncesionari/partneri privat.
3. Ndryshimet në kontratë mund të bëhen me iniciativën e të dyja palëve kontraktuese veçanërisht në rastet e mëposhtme:
 - a) kur rrezikohet siguria kombëtare dhe mbrojtja e vendit, rrezikohet mjedisi, natyra dhe shëndeti i njerëzve;
 - b) kur humbet objekti i kontratës ose kur ekziston një pamundësi objektive për përdorimin e tij, në rastin e forcës madhore;
 - c) gjatë ndryshimit të kuadrit ligjor;
 - ç) në raste të tjera që çojnë në ndryshimin e situatës reale ose ligjore për përdorimin e objektit apo ofrimin e shërbimeve ose në realizimin e kontratës.
4. Kontrata e koncesionit mund të ndryshohet pa procedurë të re të përcaktuar me këtë ligj, në rastet e mëposhtme:
 - a) kur ndryshimet, pavarësisht nga vlera e tyre monetare, parashikohen në dokumentet origjinale të projektit në dispozita të sakta dhe të qarta rishikimi, të cilat mund të përfshijnë dispozita ose

opsione të rishikimit të vlerës. Dispozita të tilla tregojnë qëllimin dhe natyrën e ndryshimeve ose mundësive potenciale dhe kushtet në të cilat ato mund të përdoren. Ato nuk parashikojnë ndryshime ose mundësi që do të ndryshonin natyrën e përgjithshme të projektit;

b) për punë ose shërbime shtesë nga koncesionari/partneri privat që janë bërë të nevojshme dhe që nuk përfshihen në projektin fillestar, kur ndryshimi i koncesionarit/partnerit privat:

- i. nuk mund të bëhet për arsye ekonomike ose teknike, siç janë kërkesat që shkëmbehen ose ndërveprueshmëria me pajisjet, shërbimet ose instalimet ekzistuese të prokuruar sipas projektit origjinal;
- ii. do të shkaktonte vështirësi të mëdha ose një rritje të konsiderueshme të kostove për autoritetin kontraktues ose entin kontraktues;

c) kur plotësohen të gjitha kushtet e mëposhtme:

- i. nevoja për ndryshim ka lindur si rezultat i rrethanave të jashtme që autoriteti kontraktues ose enti kontraktues nuk mund t'i parashikonte;
- ii. ndryshimi nuk ndryshon natyrën e përgjithshme të kontratës së koncesionit/partneritetit publik privat; dhe
- iii. nuk kalon pesëdhjetë për qind (50%) të vlerës së kontratës fillestare për çdo modifikim.

ç) kur një koncesionar/partner i ri privat zëvendëson atë me të cilin autoriteti kontraktues ka lidhur fillimisht kontratën, si rezultat i:

- i. një dispozite ose varianti të rishikimit të pa verifikuar në përputhje me pikën 5 shkronja “a” të këtij neni;
- ii. pasardhësi i përgjithshëm ose i pjesshëm privat zëvendëson ortakun e mëparshëm privat, pas ristrukturimit të shoqërisë, duke përfshirë blerjen, bashkimin ose falimentimin e një operatori tjetër ekonomik që plotëson kriteret cilësore të përzgjedhjes, të përcaktuara fillimisht me kushtin për të mos sjellë ndryshime të tjera thelbësore në kontratën e koncesionit/partneritetit publik privat dhe nuk synon të anashkalojë zbatimin e dispozitave të këtij ligji;
- iii. në rast se autoriteti kontraktues ose enti kontraktues merr përsipër detyrimet kryesore të koncesionarit/partnerit privat ndaj nënkontraktuesve të tij, nëse kjo mundësi parashikohet sipas legjislacionit në fuqi; ose

d) kur ndryshimet, pavarësisht nga vlera e tyre, nuk janë thelbësore në kuptim të pikës 11 të këtij neni.

5. Autoritetet kontraktuese ose entet kontraktuese që kanë ndryshuar kontratën e koncesionit/partneritetit publik privat sipas shkronjës “b” dhe “c”, të pikës 4 të këtij neni publikojnë një njoftim për këtë qëllim, njoftim i cili përmban minimalisht informacionin e mëposhtëm:

a) emrin, numrin e identifikimit (aty ku parashikohet në legjislacionin kombëtar), adresën duke përfshirë numrin e telefonit, faksit, e-mail-it dhe adresën e internetit të autoritetit ose entit kontraktues dhe, nëse është ndryshe, atë të shërbimit nga i cili mund të merret informacion shtesë.

b) kodet CPV.

c) Përshkrimi i koncesionit/partneritetit publik privat para dhe pas ndryshimit: natyra dhe shtrirja e punimeve, natyra dhe shtrirja e shërbimeve.

ç) Kur është e mundur, modifikimin e vlerës së koncesionit/partneritetit publik privat, duke përfshirë rritjen e çmimeve ose tarifat e shkaktuara nga ndryshimi.

d) përshkrimin e rrethanave që kanë bërë të nevojshëm modifikimin.

dh) datën e vendimit për dhënien e koncesionit/partneritetit publik privat.

e) kur është e mundur, emrin, adresën duke përfshirë numrin e telefonit, numrin e faksit, adresën e e-mail-it dhe adresën e internetit të operatorit ose operatorëve të rinj ekonomik.

ë) informacionin nëse koncesioni/partneriteti publik privat lidhet me një projekt dhe/ose program të financuar nga fondet e Bashkimit Evropian.

- f) emrin dhe adresën e organit përgjegjës për procedurat e shqyrtimit dhe, sipas rastit, të ndërmjetësimit. Informacioni e saktë në lidhje me afatin për procedurat e rishikimit, ose nëse është e nevojshme, emrin, adresën, numrin e telefonit, numrin e faksit dhe e-mail-in e shërbimit nga i cili mund të merret ky informacion.
- g) datën e dërgimit të njoftimit.
- gj) çdo informacion tjetër përkatës.
6. Njoftimi sipas pikës 5 të këtij neni, publikohet në një formular standard.
7. Përmbajtja e formularit standard përcaktohet me vendim të Këshillit të Ministrave dhe është pjesë e dokumenteve standarde të tenderit.
8. Njoftimi i kontratës publikohet në mënyrë elektronike në platformën elektronike të prokurimit dhe në Buletinin e Prokurimit Publik.
9. Përveç rasteve të parashikuara në pikën 1 të këtij neni, kontrata e koncesionit/partneriteti publik privat mund të ndryshohet edhe nëse vlera e ndryshuar e kontratës së koncesionit/partneritetit publik privat është nën dy vlerat e mëposhtme, me kusht që natyra e përgjithshme e kontratës së koncesionit/partneriteti publik privat të mos ndryshojë:
- a) nën pragu e përcaktuar në pikën 2 të nenit 22 dhe
 - b) nuk e kalon vlerën prej dhjetë për qind (10%) të kontratës së koncesionit/partneriteti publik privat.
10. Për qëllim të llogaritjes së vlerave të përcaktuara në shkronjën “b” dhe “c”, të pikës 4 dhe në pikën 9 të këtij neni, vlera e përditësuar përfaqëson vlerën e referencës kur kontrata e koncesionit përfshin një klauzolë indeksimi. Nëse kontrata e koncesionit nuk përfshin klauzolën e indeksimit, vlera e përditësuar llogaritet duke marrë parasysh inflacionin mesatar në Republikën e Shqipërisë.
11. Një ndryshim në kontratën e koncesionit/partneritetit publik privat do të konsiderohet një ndryshim thelbësor kur projekti ndryshon materialisht nga ai që ishte përfunduar fillimisht. Në çdo rast, pa cenuar pikën 4 dhe 9 të këtij neni, ndryshimi do të konsiderohet thelbësor kur plotësohen një ose më shumë nga kushtet e mëposhtme:
- a) ndryshimi i kontratës së koncesionit/partneritetit publik privat paraqet kushte të cilat, nëse do të kshin qenë pjesë e procedurës fillestare të dhënies së projektit të koncesionit/partneritetit publik privat, do të kishin lejuar pranimin e më shumë kërkuësve të ndryshëm nga ata të përzgjedhur fillimisht ose pranimin e një oferte të ndryshme nga ajo që ata kanë pranuar fillimisht.
 - b) ndryshimi i kontratës së koncesionit/partneritetit publik privat ndryshon balancën ekonomike të projektit në favor të partnerit privat në një mënyrë që nuk ishte parashikuar në projektin fillestar të koncesionit/partneritetit publik privat;
 - c) ndryshimi i kontratës së koncesionit/partneritetit publik privat zgjeron ndjeshëm objektin e projektit;
 - ç) kur një partner i ri privat/koncesionar zëvendëson atë me të cilin autoriteti kontraktues ka lidhur fillimisht kontratën e koncesionit/partneritetit publik privat, në raste të tjera nga ato të parashikuara në shkronjën “ç”/II, të pikës 4 të këtij neni.
12. Ndryshimet e kushteve thelbësore të kontratës, që nuk parashikohen në dokumentacionin e tenderit dhe/ose në vetë kontratën, kërkojnë zbatimin e një procedure të re të dhënies së kontratës së koncesionit/partneritetit publik privat.
13. Në rastin e ndryshimeve të kontratës së koncesionit/partneritetit publik privat në formën e kontratës së punëve publike ose kontratës së shërbimit publik sipas shkronjës “c” dhe “ç” të pikës 4 të nenit 7 të këtij ligji, zbatohen përcaktimet përkatëse të ligjit të prokurimit publik.
14. Për të gjitha ndryshimet e kontratës, autoriteti ose enti kontraktues kërkon një miratim paraprak nga ministria përgjegjëse për financat, e cila i vlerëson në përputhje me kriteret e përcaktuara në pikën 2, të nenit 10, të këtij ligji.

15. Çdo ndryshim i kontratës së koncesionit/partneritetit publik privat me mbështetje financiare dhe që merr përsipër risqe fiskale, vetëm pas marrjes së miratimit paraprak nga ministria përgjegjëse për financat, në përputhje me pikën 14, të këtij neni, dërgohet për miratim në Këshillin e Ministrave nga autoritetet ose entet kontraktuese.

Neni 61

Transferimi i kontratës së koncesionit/partneritetit publik privat

1. Në përputhje me dispozitat e këtij neni, me pëlqimin paraprak me shkrim nga autoriteti ose enti kontraktues, kontrata e koncesionit/partneritetit publik privat mund të transferohet te një subjekt i tretë, në përputhje me shkronjën “ç”/II, të pikës 4 të nenit 60 të këtij ligji, nëse subjekti i tretë përmbush kriteret e kualifikimit, të përcaktuara në dokumentet e tenderit, me përjashtim të rasteve kur këto kriteret u referohen kushteve që nuk janë më të nevojshme për përmbushjen e kontratës, për shkak të faktit se këto detyrime kontraktuale janë tashmë duke u përmbushur ose duke u realizuar nga koncesionari/partneri privat i mëparshëm.
2. Transferimi i kontratës së koncesionit/partneritetit publik privat nuk prish cilësinë dhe nuk përkeqëson vazhdimësinë e realizimit dhe të përmbushjes së kontratës.
3. Kur koncesionari/partneri privat është një subjekt për qëllime të veçanta, atëherë ndryshimi i të drejtave të pronësisë apo i menaxhimit të subjektit për qëllime të veçanta (SPV), si rezultat i transferimit të kapitaleve ose të aksioneve të biznesit, nuk mund të zbatohet pa miratimin e autoritetit kontraktues dhe të Ministrisë së Financave, përveçse nëse ky është një rezultat i tregtimit të rregullt të aksioneve në një treg të rregulluar të kapitalit.
4. Për të gjitha transferimet e kontratës, autoriteti ose enti kontraktues kërkon një miratim paraprak nga ministria përgjegjëse për financat, e cila i vlerëson në përputhje me kriteret e përcaktuara në pikën 2, të nenit 10, të ligjit.
5. Çdo transferim i kontratës së koncesionit/partneritetit publik privat me mbështetje financiare dhe që merr përsipër risqe fiskale, vetëm pas marrjes së miratimit paraprak nga ministria përgjegjëse për financat, në përputhje me pikën 4, të këtij neni, dërgohet për miratim në Këshillin e Ministrave nga autoritetet ose entet kontraktuese.

Neni 62

Nënkontraktimi

1. Autoriteti ose enti kontraktues në dokumentet e tenderit mund t'u kërkojë ofertuesve të tregojnë në ofertat e tyre përqindjen e kontratës, që ata mendojnë të nënkontraktojnë te palët e treta, si dhe nënkontraktorin e propozuar.
2. Kjo përqindje e caktuar për nënkontraktim duhet të jetë në përpjesëtim me vlerën e kontratës dhe nuk duhet të tejkalojë 50 për qind të vlerës së përgjithshme të kontratës.
3. Autoriteti ose enti kontraktues miraton nënkontraktorët e mundshëm përpara lidhjes së nënkontratës me operatorin ekonomik fitues të kontratës publike, në përputhje me dispozitat e këtij ligji, pa cenuar parimet e përcaktuara në pikën 4 të këtij neni.
4. Dispozitat e këtij neni nuk prekin përgjegjësitë kryesore të operatorit ekonomik ndaj autoritetit ose entit kontraktues, për të cilin nënkontraktorët mbeten palë e tretë, kundrejt marrëdhënies kontraktuale ndërmjet operatorit ekonomik dhe nënkontraktorëve të tij dhe duke e lënë operatorin ekonomik kryesor përgjegjës për zbatimin e të gjithë kontratës, pavarësisht se një pjesë e saj zbatohet nga nënkontraktorët.
5. Autoriteti ose enti kontraktues lejohet të bëjë pagesa drejtpërsëdrejti te nënkontraktori për furnizimet, shërbimet ose punët që i ka ofruar kontraktorit kryesor. Në çdo rast, kontraktori kryesor

duhet të vihet në dijeni dhe të japë miratimin me shkrim për këto pagesa. Rregullat që lidhen me këtë mënyrë pagese përcaktohen në dokumentet e tenderit.

6. Në rastin e koncesioneve për punë, sa i përket shërbimeve që do të ofrohen në objekt nën mbikëqyrjen e autoritetit ose entit kontraktues, pas dhënies së koncesionit dhe jo më vonë se momenti i fillimit të zbatimit të tij, autoriteti ose enti kontraktues do t'i kërkojë koncesionarit që të bëjë të ditur emrin, të dhënat e kontaktit dhe përfaqësuesit ligjor të nënkontraktorëve të tij, të përfshirë në këto punë dhe shërbime, për aq sa ky informacion është i disponueshëm në atë moment. Gjithashtu, koncesionari është i detyruar të njoftojë autoritetin ose entin kontraktues për çdo ndryshim në këtë informacion gjatë gjithë periudhës së koncesionit, si dhe për çdo nënkontraktor të ri që mund të përfshijë më vonë në këto punë ose shërbime.

Pavarësisht nga paragrafi i mësipërm, autoritetet ose entet kontraktuese mund të vendosin si detyrim që informacioni i kërkuar t'u dërgohet drejtpërdrejt nga koncesionari.

Këto rregulla nuk zbatohen për furnizuesit.

Autoritetet ose entet kontraktuese mund të zgjerojnë këto detyrime, për shembull:

- a) për koncesionet e shërbimeve që nuk lidhen me shërbimet e ofruara në objektet nën mbikëqyrjen e autoritetit ose entit kontraktues apo me furnizuesit e përfshirë në koncesionet e punëve dhe shërbimeve;
- b) për nënkontraktorët e nënkontraktorëve të koncesionarit ose për hallkat e mëtejshme në zinxhirin e nënkontraktimit.

7. Me qëllim shmangien e shkeljeve të detyrimeve të përcaktuara në nenin 30, pika 4, mund të merren masat e mëposhtme:

- a) Nëse legjislacioni kombëtar parashikon një mekanizëm përgjegjësie të përbashkët mes koncesionarit dhe nënkontraktorëve të tij, autoriteti ose enti kontraktues siguron që këto rregulla të zbatohen në përputhje me nenin 30, pika 4 të këtij ligji.
- b) Autoritetet ose entet kontraktuese mund të verifikojnë nëse ekzistojnë arsye për përjashtimin e nënkontraktorëve, në përputhje me nenin 37, pikat 4-~~10~~12 të këtij ligji. Nëse verifikimi tregon se ka arsye të detyrueshme për përjashtim, autoriteti ose enti kontraktues i kërkon operatorit ekonomik të zëvendësojë nënkontraktorin përkatës. Nëse verifikimi tregon arsye jo të detyrueshme për përjashtim, autoriteti ose enti kontraktues mund të kërkojë që operatori ekonomik ta zëvendësojë atë.

8. Rregulla më të hollësishme për nënkontraktimin përcaktohen me vendim të Këshillit të Ministrave.

Neni 63

Rregullat në fuqi për kontratat e punëve që u jepen palëve të treta nga koncesionarët e punëve publike

- 1. Këto rregulla zbatohen për punët publike të koncesionarëve, të cilat, sipas këtij ligji, nuk janë autoritete kontraktuese.
- 2. Kur një koncesionar u jep kontrata punësh palëve të treta në një vlerë të përllogaritur mbi 700 000 000 lekë, duke përjashtuar tatimin mbi vlerën e shtuar, koncesionari zbaton rregullat e mëposhtme:
 - a) koncesionari publikon në mënyrë të detyrueshme dhe në një formular standard njoftimin e kontratës në Buletinin e Prokurimit Publik, me synimin për dhënien e kontratës së punëve palëve të treta;

- b) afati i fundit për dorëzimin e kërkesave për pjesëmarrje përcaktohet nga koncesionari dhe nuk duhet të jetë më i shkurtër se 37 ditë nga data e publikimit të njoftimit të kontratës;
 - c) afati i fundit për dorëzimin e ofertave përcaktohet nga koncesionari dhe nuk duhet të jetë më i shkurtër se 40 ditë nga data e publikimit të njoftimit të kontratës, domethënë nga dërgimi i ftesave për dorëzimin e ofertave;
 - ç) me përjashtim të përcaktimit të shkronjave “b” dhe “c” të kësaj pike, në rastin kur kërkesa për pjesëmarrje dhe ofertat janë paraqitur me anë të mjeteve elektronike, zbatohet ligji i prokurimit publik, në përputhje me rrethanat, edhe për shkurtime të afateve të përcaktuara në pikat 2 dhe 3 të këtij neni;
 - d) afatet kohore për dorëzimin e kërkesave për pjesëmarrje dhe ofertave shtyhen në një mënyrë, në të cilën të gjithë operatorët e interesuar ekonomikë mund të marrin të gjithë informacionin e nevojshëm, në rastet e mëposhtme:
 - i) nëse dokumentacioni i tenderit dhe të gjitha informacionet shtesë nuk janë dhënë në afatet e parashikuara;
 - ii) nëse nuk sigurohet vizita dhe informacioni për vendin e ndërtimit dhe për të gjitha dokumentet e nevojshme për përgatitjen e ofertave.
3. Vlera e kontratave të përmendura në pikën 2 të këtij neni llogaritet në përputhje me dispozitat e këtij ligji.
4. Grupet e shoqërive, të cilat janë formuar për të marrë koncesionin ose shoqëritë që lidhen me to nuk konsiderohen palë të treta.
5. “Shoqëri e lidhur” ka kuptimin e çdo shoqërie tjetër, që lidhet me koncesionarin nëpërmjet pronësisë, kontrollit dhe drejtimit të përbashkët. Mund të realizohet në një nga format e mëposhtme ku:
- a) koncesionari mund të ushtrojë një ndikim mbizotërues, direkt apo indirekt, mbi shoqërinë;
 - b) shoqëria mund të ushtrojë një ndikim mbizotërues, direkt apo indirekt, mbi koncesionarin.
6. Ndikimi mbizotërues nga ana e shoqërisë presupozohet kur, direkt apo indirekt, në lidhje me një shoqëri tjetër, ajo:
- a) mban shumicën e kapitalit të nënshkruar të shoqërisë;
 - b) kontrollon shumicën e votave bashkëngjitur aksioneve të emetuara nga shoqëria; ose
 - c) mund të emërojë më shumë se gjysmën e organit administrativ, drejtues ose mbikëqyrës të shoqërisë.
7. Lista shteruese e shoqërive të tilla përfshihet në kërkesën për koncesion. Koncesionari informon autoritetin kontraktues për çdo ndryshim të mëvonshëm në marrëdhëniet ndërmjet shoqërive.

Neni 64

Zgjidhja e kontratës së koncesionit/partneritetit publik privat

1. Autoriteti ose enti kontraktues mund të ndërpresë kontratën kur:
 - a) mund të provojë se koncesionari/partneri privat nuk mund të kryejë detyrimet e veta, për shkak të paaftësisë paguese, shkeljeve serioze apo çështjeve të tjera që pengojnë apo nuk lejojnë vazhdimin e kontratës, në përputhje me standardet teknike dhe me standardet e tjera të pranuara;
 - b) ka ndodhur një ndryshim i kontratës së koncesionit/partneritetit publik privat, e cila do të kërkonte një procedurë të re të dhënies së kontratës në përputhje me nenin 60 të këtij ligji;
 - c) koncesionari/partneri privat ka qenë, në momentin e zhvillimit të procedurës konkurruese të dhënies së kontratës, në një nga situatat e përcaktuara në pikën 4 të nenit 37 të këtij ligji dhe për rrjedhojë, duhet të ishte përjashtuar nga kjo proceurë;
 - ç) koncesionari/partneri privat dështon në sigurimin e financimit të projektit brenda 12 muajve nga nënshkrimi ose hyrja në fuqi e kontratës.

2. Secila palë, përveç rasteve kur parashikohet ndryshe në kontratë, ka të drejtë të zgjidhë kontratën kur:
 - a) përmbushja e detyrimeve bëhet e pamundur, për shkak të rrethanave të secilës palë;
 - b) ka shkelje serioze nga pala tjetër dhe se kjo palë nuk mund ta korrigjojë këtë shkelje brenda afatit kohor dhe në mënyrën e përcaktuar në kontratë.
3. Palët kanë, gjithashtu, të drejtë të zgjidhin kontratën me pëlqimin reciprok.
4. Para zgjidhjes së kontratës, në përputhje me këtë nen, autoriteti ose enti kontraktues informon ministrinë përgjegjëse për financat për të gjitha rrethanat e njohura, të cilat çojnë dhe krijojnë kushtet për zgjidhjen e kontratës dhe kërkon mendimin e saj.

Neni 65

Njësia e Zbatimit të Kontratës

1. Njësia e Zbatimit të Kontratës (NjZK) është njësia e përhershme e ngritur brenda autoritetit kontraktues, përgjegjëse për menaxhimin e kontratës së koncesionit/partneritetit publik privat. Menaxhimi i kontratës është procesi i administrimit dhe mbikëqyrjes së ekzekutimit të kontratës nga hyrja në fuqi deri në përfundimin e saj. Ky proces siguron që të gjitha palët kontraktuese të përmbushin detyrimet e tyre në përputhje me kushtet, afatet dhe termat e përcaktuara në kontratë, duke adresuar çdo problematikë që mund të lindë gjatë zbatimit të saj. NjZK monitoron zbatimin e parashikimeve të kontratës, kushteve dhe afateve të saj si dhe legjislacionin në fuqi, duke adresuar te titullari i autoritetit kontraktues çdo problematikë që mund të lindë gjatë zbatimit të saj.
2. Detyrat e NjZK-së përfshijnë hartimin e planit të detajuar të zbatimit të kontratës, monitorimin e performancës jo-financiare, monitorimin e performancës financiare, menaxhimin e rreziqeve/risqeve, raportimin dhe dokumentimin e zbatimit të kontratës, vlerësimin përfundimtar ose zgjatjen e afatit të kontratës, trajtimin e kërkesave apo pretendimeve që koncesionari/partneri privat ka ndaj Autoritetit Kontraktues në kuadër të kontratës së koncesionit/partneritetit publik privat, si edhe problematika të tjera që mund të lindin gjatë periudhës së zbatimit të saj. Për përmbushjen e detyrave të renditura më sipër, kur është e nevojshme, NjZK kërkon nga Autoriteti Kontraktues mbështetje me ekspertizë të specializuar. Kur Autoritetit Kontraktues i mungon ekspertiza e specializuar që kërkohet nga NjZK, e siguron atë nëpërmjet ekspertëve/konsulentëve të jashtëm të pajtuar në përputhje me procedurat e prokurimit publik.
3. NjZK harton dhe i paraqet autoritetit kontraktues të paktën katër raporte periodike në vit për performancën financiare dhe jo financiare të kontratave të koncesionit/partneriteti publik privat, si dhe një raport vjetor mbi ecurinë e zbatimit të kushteve dhe afateve të kontratës së koncesionit/partneritetit publik privat i cili përfshin të dhëna mbi sasinë dhe cilësinë e punëve dhe shërbimeve të realizuara, njoftimet që palët kontraktuese i kanë bërë njëra-tjetrës, si dhe identifikimin e çdo problematike të hasur gjatë periudhës së raportimit.
4. Përpara përfundimit të kontratës, NjZK harton raportin përfundimtar mbi realizimin e kontratës, i cili përmban një vlerësim të plotë të zbatimit dhe realizimit të kontratës, mangësive apo problematikave të hasura në vite si dhe mënyrën e zgjidhjes apo tejkalimit të tyre.
5. Rregullat e hollësishme për mënyrën e ngritjes dhe funksionet e NjZK, përcaktohen me vendim të Këshillit të Ministrave.

KREU V

ÇËSHTJET FINANCIARE DHE ÇËSHTJET E LIDHURA

Neni 66

Marrëdhëniet e pronësisë

1. Në rast se një kontratë koncesioni/partneriteti publik privat përfshin përdorimin e pasurisë në pronësi të një personi që nuk i përfshirë në procedurën për dhënie të kontratës, marrëdhëniet e pronësisë që shoqërojnë një pasuri të tillë duhet të zgjidhen sipas legjislacionit në fuqi, në mënyrë që të mos pengohet realizimi i projektit gjatë periudhës së kontraktuar.
2. Nëse Republika e Shqipërisë është pronare e pasurisë së paluajtshme, të përfshirë në realizimin e një kontrate koncesioni/partneriteti publik privat, ose nëse koncesioni/partneriteti publik privat përfshin përdorimin e të mirave publike, atëherë autoriteti kontraktues zgjidh të gjitha marrëdhëniet e pronësisë, në përputhje me legjislacionin në fuqi, në një mënyrë që të mos pengohet realizimi i projektit gjatë periudhës së kontraktuar.

Neni 67

E drejta e pronësisë

3. Objektet e ndërtuara në bazë të një kontrate koncesioni/partneriteti publik privat, duke përfshirë shtesat dhe përmirësimet, janë në pronësi të autoritetit kontraktues, përveçse kur parashikohet ndryshe në kontratë.
4. Në dokumentacionin e tenderit autoriteti kontraktues duhet të parashikojë kushtet, në bazë të të cilave rregullohen të drejtat e pronësisë, të përshkruara në pikën 1 të këtij neni.
5. Pas zgjidhjes së kontratës, koncesionari/partneri privat është i detyruar të dorëzojë objektet e ndërtuara në bazë të kontratës, pavarësisht nëse ato janë ndërtuar, rindërtuar, ruajtur, pajisur ose përmirësuar, tërësisht ose pjesërisht, sipas kushteve dhe mënyrës së përcaktuar në kontratë, përveçse kur parashikohet ndryshe nga ky ligj.
6. Të gjitha çështjet, duke përfshirë edhe kushtet që kanë të bëjnë me të drejtat e pronësisë, si dhe standardet e kërkuara të cilësisë, janë objekt i analizës së studimit të fizibilitetit të koncesionit/partneritetit publik privat për atë kontratë dhe të përcaktuara në dokumentacionin e tenderit, si dhe në vetë kontratën.

Neni 68

Subjekti për qëllime të veçanta (SPV)

1. Autoriteti kontraktues mund të kërkojë në dokumentacionin e tenderit që operatori ekonomik zgjedhur si ofertuesi më i suksesshëm të krijojë një person juridik, me seli në Republikën e Shqipërisë, i cili lidh kontratën.
2. Subjekti për qëllime të veçanta mund të marrë pjesë vetëm në realizimin e një kontrate koncesioni/partneriteti publik privat, për të cilën ai është themeluar.
3. Në rastin e përcaktuar në pikën 1 të këtij neni, në dokumentacionin e tenderit përcaktohen forma e personit juridik, shuma minimale e kapitalit, detyrimet e ofertuesit më të suksesshëm, në lidhje me themelimin e saj, si dhe marrëdhëniet e tjera midis ofertuesit më të suksesshëm, subjektit për qëllime të veçanta dhe autoritetit kontraktues.

Neni 69

Interesat e sigurisë

1. Koncesionari/partneri privat mund sigurojë të drejtat e tij ndaj çdo pagese të çdo lloji të marrë ose që pritet të merret nga ai në zbatim të një kontrate koncesioni/partneriteti publik privat ose në lidhje me të, pa cenuar të drejtën e tij ndaj çdo pjese tjetër të pasurisë së tij. Ky sigurim nuk mund të krijohet pa pëlqimin e autoritetit kontraktues dhe mund të bëhet vetëm në favor të institucioneve financiare për të siguruar pretendimet e këtyre institucioneve, mbi bazën e kontratës së kredisë.

2. Pretendimet e institucionit financiar, sipas pikës 1 të këtij neni, lidhen vetëm me instrumentet financiare të fituara për qëllime të ekzekutimit të kontratës së koncesionit/partneritetit publik privat dhe nuk përfshijnë asnjë nga pretendimet e tjera që institucionet financiare kanë ndaj koncesionarit/partnerit privat për arsye të tjera.

Neni 70

Dispozita e stabilizimit

1. Në përputhje me pikën 2 të këtij Neni, Autoriteti kontraktues mund të hyjë në një angazhim detyrues, në emër të shtetit, që do të ketë efektin e sigurimit të garancive të përshtatshme në favor të koncesionarit/partnerit privat, me të cilin do të mbrohet kundër pasojave financiare të legjislacionit, i cili hyn në fuqi pas fillimit të kontratës së koncesionit/partneritetit publik privat, që u nënshtrohet kufizimeve të mëposhtme:
 - a) pasojat financiare duhet të përshkruhen në mënyrë të qartë dhe të saktë;
 - b) angazhimi përfundon me përfundimin e marrëveshjes së koncesionit;
 - c) duhet të përshkruhet natyra e legjislacionit.
2. Një angazhim i tillë detyrues mund të ndërmerret vetëm pas miratimit me vendim të Këshillit të Ministrave, me kërkesën e autoritetit kontraktues.

KREU VI

ANKIMI ADMINISTRATIV

Neni 71

E drejta e ankimit

1. Çdo operator ekonomik, i cili ka ose ka pasur interes në një procedurë konkurruese dhe kur është dëmtuar ose rrezikohet të dëmtohet nga vendimmarrja e autoritetit/entit kontraktues, për të cilin pretendon se është marrë në kundërshtim me ligjin, ka të drejtë të ankohet pranë Komisionit të Prokurimit Publik.
2. Ndaj vendimit të Komisionit të Prokurimit Publik, ankimuesi ka të drejtë të ankimojë në gjykatën përkatëse që shqyrton mosmarrëveshjet administrative. Ankimi në gjykatë nuk pezullon procedurat konkurruese, lidhjen e kontratës apo ekzekutimin e detyrimeve mes palëve.

Neni 72

Afatet e ankimit

1. Në rastin e ankesave për dokumentet e procedurës konkurruese, operatorët ekonomikë kanë të drejtë të ankimojnë brenda 10 ditëve nga dita e nesërme e publikimit në platformën e prokurimit elektronik të njoftimit të kontratës ose publikimit të ndryshimit të kërkesave në dokumentet e tenderit.
2. Në rastin e ankesave për vendimin e vlerësimit/klasifikimit përfundimtar, operatorët ekonomikë kanë të drejtë të ankimojnë brenda 10 ditëve nga dita e nesërme e publikimit në platformën e prokurimit elektronik të njoftimit të fituesit ose publikimit të njoftimi të anulimit.
3. Në procedurat me faza, në rastin e ankesave për vendimin e përzgjedhjes së kandidatëve pas fazës së parakualifikimit, operatorët ekonomikë kanë të drejtë të ankohen brenda 10 ditëve nga marrja e njoftimit për këtë vendim. Në rastin e ankesave për vendimin e vlerësimit/klasifikimit të ofertave, operatorët ekonomikë kanë të drejtë të ankohen sipas përcaktimeve në pikën 2 të këtij neni.

Neni 73

Paraqitja e ankesës

1. Operatori ekonomik ankimues dërgon njëkohësisht ankesën në autoritetin ose entin kontraktues dhe në Komisionin e Prokurimit Publik. Rregulla të posaçme për mënyrën e paraqitjes së ankesës përcaktohen me vendim të Këshillit të Ministrave.
2. Ankesa bëhet sipas formularit përkatës, ku shënohen emri dhe adresa e ankuesit, referimi për procedurën konkrete dhe bazën ligjore ku ankuesi pretendon për shkeljet, duke e shoqëruar atë me dokumentacionin dhe provat përkatëse, për të cilat mendon se mbështesin ankimin e tij. Elementet e sipërpërmendura janë të domosdoshme për shqyrtimin e ankesës. Ankimuesi është i detyruar t'i bashkëlidhë ankimit dokumentin bankar që vërteton pagesën e tarifës për shqyrtimin e ankesës nga Komisioni i Prokurimit Publik.
3. Nëse mungon ndonjë nga elementet e përcaktuar në pikën 2 të këtij neni ose formulari i ankesës nuk është plotësuar në mënyrën e duhur, atëherë Komisioni i Prokurimit Publik duhet të vërë në dijeni ankimuesin për të plotësuar mangësitë. Njoftimi mund të bëhet me çdo mjet të mundshëm, përfshirë edhe postën elektronike, dhe në çdo rast dokumentohet. Nëse ankesa nuk korrigjohet brenda 2 ditëve nga njoftimi, ajo vlerësohet si e paparaqitur.

Neni 74 Veprimet paraprake

1. Me regjistrimin e ankesës në Sistemin e Ankesave Elektronike dhe publikimin e saj nga Komisioni i Prokurimit Publik, Sistemi i Prokurimit Elektronik në ndërveprim me Sistemin e Ankesave Elektronike pezullon në mënyrë automatike vazhdimin e procedurës konkurruese deri në shqyrtimin plotësisht të ankesës, përfshirë edhe nxjerrjen e një vendimi nga Komisioni i Prokurimit Publik me nënshkrim dhe vulë elektronike.
2. Komisioni i Prokurimit Publik, me marrjen e ankesës në përputhje me këtë ligj, publikon në bazën e të dhënave përmes ndërveprimit me sisteme të treta, të dhënat e mëposhtme:
 - a) për ankimuesin, adresën dhe NUIS-in;
 - b) të dhëna të plota për procedurën konkurruese (objekt, numër reference, fond limit, datën e zhvillimit të procedurës).
3. Në mënyrë që ankesa të bëhet e aksesueshme jo vetëm nga autoriteti ose enti kontraktues, por njëkohësisht edhe nga operatorët ekonomikë të interesuar, Komisioni i Prokurimit Publik publikon:
 - a) ankesën e plotë në rastin e ankesave për dokumentet e tenderit;
 - b) arsyet e skualifikimit në rastin e ankesave për vendimin e vlerësimit/klasifikimit përfundimtar;
 - c) pretendimet mbi kualifikimin/skualifikimin e ofertuesve të tjerë duke referuar vetëm kriteret për të cilat ngrihen pretendime.
4. Sistemi i Ankesave Elektronike në ndërveprim me Sistemin e Prokurimit Elektronik gjeneron një kod autentifikimi unik, që u vihet në dispozicion operatorëve ekonomikë të interesuar për t'u njohur me atë pjesë të ankesës, për të cilën ngrihen pretendime. Në asnjë rast Komisioni nuk jep akses në informacion të klasifikuar si sekret tregtar.

Neni 75 Të drejtat e operatorëve ekonomikë të interesuar

1. Në rastet e ankesave për vendimet e autoritetit ose entit kontraktues për përzgjedhjen e kandidatëve pas fazës së parakualifikimit ose për procesin e vlerësimit të ofertave, operatorët ekonomikë, të cilët kanë marrë pjesë në procedurën e prokurimit dhe mund të cenohen nga ankesa e paraqitur, kanë të drejtë të paraqesin argumentet e tyre në lidhje me këtë të fundit njëkohësisht pranë autoritetit ose entit kontraktues dhe Komisionit të Prokurimit Publik.

Afati kohor për paraqitjen e këtyre argumenteve është 7 ditë nga publikimi i ankesës nga Komisioni i Prokurimit Publik.

2. Nëse operatorët ekonomikë të interesuar nuk kanë paraqitur argumente që kundërshtojnë ankesën, sipas parashikimeve të pikës 1 të këtij neni, nuk mund të ushtrojnë më pas të drejtën e ankimit për vendimin e dhënë në lidhje me ankesën për këtë procedurë.

Neni 76

Vendimet e Komisionit të Prokurimit Publik

1. Komisioni i Prokurimit Publik përgjigjet me shkrim brenda 10 ditëve nga data e depozitimit të ankesës. Kur për shqyrtimin e ankesës kërkohet informacion nga autoriteti kontraktues, Komisioni i Prokurimit Publik përgjigjet me shkrim jo më vonë se 20 ditë.
2. Komisioni i Prokurimit Publik, në çdo kohë pas marrjes së ankesës dhe para lidhjes së kontratës, kur nuk vendos pezullimin, mund ta lejojë autoritetin ose entin kontraktues, me anë të një vendimi të ndërmjetëm deri në marrjen e një vendimi përfundimtar, të vazhdojë procedurën konkurruese nëse pezullimi dëmton tërthorazi interesin publik, autoritetin ose entin kontraktues ose ofertuesit.
3. Përpara lidhjes së kontratës, Komisioni i Prokurimit Publik ka të drejtë:
 - a) të refuzojë ankesën për shkak të mosrespektimit të afateve të ankimit, sipas parashikimeve të nenit 43/1 të këtij ligji;
 - b) të pranojë ankesën dhe të urdhërojë autoritetin ose entin kontraktues të anulojë plotësisht ose pjesërisht një veprim ose vendim, të nxjerrë në kundërshtim me ligjin;
 - c) të refuzojë ankesën dhe të lejojë autoritetin ose entin kontraktues të vazhdojë procedurën e prokurimit, kur gjykon se nuk ka shkelje të dispozitave ligjore;
 - ç) të refuzojë ankesën, e cila ka si objekt kundërshtimin e një vendimi të dhënë nga Komisioni i Prokurimit Publik, në rast të një ankese tjetër që i përket të njëjtës procedurë, të paraqitur nga i njëjti operator ekonomik.
4. Pas lidhjes së kontratës, Komisioni i Prokurimit Publik, kur gjykon se një vendim apo veprim i autoritetit ose entit kontraktues është në kundërshtim me ndonjë nga dispozitat e këtij ligji, ka të drejtë:
 - a) të deklarojë absolutisht të pavlefshme kontratën e nënshkruar, në përputhje me parashikimet e këtij ligji;
 - b) të urdhërojë autoritetin kontraktues për shkurtimin e kohëzgjatjes së kontratës dhe të kërkojë ndërprerjen e parakohshme të saj;
 - c) të marrë një vendim deklarativ, në bazë të të cilit pushteti gjyqësor mund të dëmshpërblejë ankuesin, që ka pësuar humbje ose dëme si rezultat i shkeljes së këtij ligji.

Neni 77

Tërheqja e ankimit

1. Ankimuesi ka të drejtë që të tërheqë ankesën e depozituar në çdo kohë përpara përfundimit të afatit për shqyrtimin e saj nga ana e Komisionit të Prokurimit Publik. Tërheqja e ankesës konsiderohet si mospranim ankese dhe ankimuesit nuk i kthehet tarifa e ankesës.
2. Në rast të tërheqjes së ankesës, Komisioni i Prokurimit Publik ndërpret shqyrtimin e saj menjëherë dhe merr vendim për mbylljen e çështjes.

Neni 78

Pavlefshmëria e kontratave

1. Një kontratë konsiderohet absolutisht e pavlefshme në rastet e mëposhtme:
 - a) nëse një autoritet ose ent kontraktues ka nënshkruar një kontratë pa publikuar paraprakisht shpalljen e njoftimit të kontratës, në kundërshtim me parashikimet e këtij ligji;
 - b) kur nuk janë zbatuar parashikimet e këtij ligji në lidhje me zbatimin e procedurave të ankimit, duke privuar personat e interesuar për të ushtruar të drejtën e tyre për ankim;
 - c) kur nuk janë zbatuar rregullat për rihapjen e garës për kontratat e lidhura në bazë të një marrëveshjeje kuadër me disa operatorë ekonomikë, ku jo të gjitha kushtet janë të përcaktuara dhe në sistemin dinamik të blerjeve të ndarë në kategori;
 - ç) kur kontrata është nënshkruar në kushtet e konfliktit të interesit;
 - d) nëse një autoritet ose ent kontraktues ka nënshkruar një kontratë duke mos respektuar vendimin e dhënë nga Komisioni i Prokurimit Publik.
2. Kontrata mund të mos shpallet absolutisht e pavlefshme edhe nëse ajo është lidhur në kushtet e pikës 1 të këtij neni, nëse Komisioni i Prokurimit Publik, pas shqyrtimit të të gjitha aspekteve përkatëse, çmon se shpallja e pavlefshme e kësaj kontrate mund të cenojë çështjet thelbësore të interesit të përgjithshëm.

Interesat ekonomike të lidhura drejtpërdrejt me kontratën në fjalë, si kostot për shkak të vonesave në zbatimin e kontratës, kostot për shkak të shpalljes së një procedure të re prokurimi, kostot për shkak të ndryshimit të operatorit ekonomik që do të zbatojë kontratën, si edhe kostot për shkak të detyrimeve ligjore si pasojë e pavlefshmërisë nuk konsiderohen çështje thelbësore të interesit të përgjithshëm.
3. Në rastin e konstatimit të situatave sipas pikës 2 të këtij neni, Komisioni i Prokurimit Publik ka të drejtë të aplikojë zbatimin e masave të tjera administrative, si:
 - a) dënimin me gjobë të autoritetit ose entit kontraktues për shkeljet e konstatuara;
 - b) urdhërimin e autoritetit kontraktues për shkurtimin e afatit të zbatimit të kontratës për të minimizuar dëmin e shkaktuar.
4. Gjoka duhet të vendoset në raport me vlerën e kontratës së nënshkruar, por, në çdo rast, jo më shumë se 10% e kësaj vlere.
5. Rregullat e posaçme për këtë proces përcaktohen me vendim të Këshillit të Ministrave.

Neni 79

Detyrimi për bashkëpunim

Refuzimi i nëpunësit civil, i funksionarit ose autoritetit/entit kontraktues për të dhënë informacion apo për të paraqitur dokumentacionin që ka lidhje me procedurën nën hetim administrativ, përbën shkak që Komisioni i Prokurimit Publik, ministria për financat të kërkojnë marrjen e masave disiplinore ndaj personave përgjegjës.

Neni 80

Kundërvajtjet administrative

1. Shkelja e dispozitave të këtij ligji nga personat përgjegjës, kur nuk përbën vepër penale, përbën kundërvajtje administrative dhe dënohet me gjobë nga 50 000 lekë deri në 1 000 000 lekë.
[Gjoka vendoset nga Agjencia e Prokurimit Publik.](#)
2. Ministri përgjegjës për financat, [Agjencia e Prokurimit Publik](#) ose Komisioni i Prokurimit Publik, kur është rasti, mund t'i propozojnë drejtuesit të autoritetit kontraktues marrjen e masave disiplinore ndaj personave përgjegjës.

Neni 81

Zgjidhja e mosmarrëveshjeve

1. Kontrata e koncesionit/partneritetit publik privat rregullohet nga ligjet e Republikës së Shqipërisë.
2. Koncesionari/partneri privat, aksionarët e tij dhe ortakët e tjerë të biznesit janë të lirë të zgjedhin ligjin që rregullon marrëdhëniet e ndërsjella të tyre të biznesit.
3. Çdo mosmarrëveshje ndërmjet autoritetit kontraktues dhe koncesionarit /partnerit privat zgjidhet përmes mekanizmave për zgjidhjen e mosmarrëveshjeve, të pranuar nga palët në kontratën e koncesionit/partneritetit publik privat, duke përfshirë edhe procedurat e arbitrazhit ndërkombëtar. Në çdo rast, ligji i zbatueshëm është ligji shqiptar në fuqi.
4. Koncesionari/partneri privat, aksionarët e tij dhe ortakët e tjerë të biznesit janë të lirë të zgjedhin mekanizmat e duhur për zgjidhjen e mosmarrëveshjeve ndërmjet tyre.

KREU VII DISPOZITA KALIMTARE DHE TË FUNDIT

Neni 82 Shfuqizimet

Ligji nr. 125/2013 “Për koncesionet dhe partneritetin publik privat”, i ndryshuar, shfuqizohet.

Neni 83 Zbatimi i dispozitave

Dispozitat e këtij ligji nuk zbatohen për veprimet dhe procedurat për dhënien e koncesioneve/partneriteteve publike private, të filluara para hyrjes në fuqi të këtij ligji.

Neni 84 Aktet nënligjore

1. Këshilli i Ministrave, brenda një afati prej tre muajsh nga hyrja në fuqi e këtij ligji, miraton aktet nënligjore në zbatim të pikës 2 të nenit 10, të pikës 4 të nenit 12, të pikës 4 të nenit 13, të pikës 2 të nenit 22, të pikës 2 të nenit 24, të pikës 2 dhe 5 të nenit 25, të pikës 2 të nenit 28, të pikës 8 të nenit 29, të pikës 5 të nenit 30, të pikës 2 të nenit 31, të nenit 32, të pikës 4 të nenit 33, të pikës 2 të nenit 34, të pikës 4 të nenit 41, të pikës 4 të nenit 47, të pikës 5 të nenit 48, të pikës 2 të nenit 49, të pikës 8 të nenit 55, të pikës 7 të nenit 60, të pikës 8 të nenit 62, të pikës 1 të nenit 73 dhe të pikës 5 të nenit 78.
2. Ministri përgjegjës për financat, brenda një afati prej tre muajsh nga hyrja në fuqi e këtij ligji, miraton udhëzimin në zbatim të pikës 4 të nenit 10 të këtij ligji.

Neni 85 Kontratat e koncesionit të nënshkruara

Ky ligj nuk zbatohet për kontratat e koncesionit të nënshkruara para hyrjes në fuqi të këtij ligji, përveç dispozitave që rregullojnë regjistrin e koncesioneve/partneriteteve publike private, të cilat duhet të rregullohen brenda gjashtë muajve nga hyrja në fuqi e këtij ligji.

Neni 86 Hyrja në fuqi

Ky ligj hyn në fuqi 15 ditë pas botimit në Fletoren Zyrtare.